

近代中國史料叢刊續編第二十輯
沈雲龍主編

趙恭毅公（申喬）賸稿

趙何敷編

文海出版社
有限公司
印行

趙恭毅公贈藁序

天下知有趙武進久矣自

朝廷百官卿貳僚案下逮氓隸耳公名怖公威望想見公風采唏噓乎何令人仰重至是耶公由進士宰商邱有聲內擢刑曹遷比部以執法乞假在籍七年

聖祖仁皇帝特起公超受浙江布政使旋卽秉鉞清風峻節惠政在民轉撫偏沅舉積習而掃除之八年之閒興廢舉錯不狗不阿較在浙時爲尤烈遂量移總憲晉秩大司農

帝眷益隆亮直益切凡關

國計民生作奸犯科因事陳說雖劉更生封事任伯雨章疏無以過此嶽嶽懷芳一時推蹇諤風必以公爲屈一指余時方鍵戶讀古人書知

朝廷有骨鯁臣而未謀面己丑公冢君裴萼先生魁天下余
固知必有後先濟美者洎公以老疾乞休卒於京耶

仁皇帝哀之錫諡曰恭毅

世宗憲皇帝卽位詔立賢良祠于京師文武大臣公忠正直完全
名節者祀之而公得與焉前年己未余奉

今天子命承乏閩浙公之孫侗敷爲浙江觀察副使任齷郵出
公贖稿蓋侗敷彙浙中藁案略存湖南實政錄暨自治官
書之刻而纂輯編次竊然成集向之耳公名者今乃得讀
公所爲奏疏及雜著益想見其爲人余讀史漢至公家廣
漢治潁川爲拏筭姦黨盡皆散落後爲京兆尹尤善鉤距
閩里銖兩之奸適發如神三輔爲之肅清竊嘆古大臣立
朝蒞政剛方廉厲與溫柔惠其所以愛民成俗要於善

治者有同旨歟非然何鄭子產有古遺愛之稱那公自浙而楚入官京師數歷中外所在震懾公之指前人以張其侯者於茲刻蓋見一斑矣侗敦以裘萼膾藁附後覽者見宮霍鮮別之攸分也詎不盛哉

乾隆六年夏四月濟齋德沛書

諸國六軍國四日

官設於地之知

則齊并其國

則安人而取

則不為國

趙恭毅公贍藁序

先師恭毅公仕宦三十餘年所至著有政績後之人欲紀其實以垂不朽於浙中有藁案略存之刻於湖南有實政錄暨自治官書之刻最後其文孫侗數復殫心搜輯纂成贍藁八卷以書貽廷璐而請爲之序蓋距吾師沒時已十八年於茲矣吾師出任封疆入參帷幄清節重望久而彌光固已耀旂常銘鐘鼎矣雖海內之小夫孺子莫不知公爲一代偉人而公之目營手治竭慮殫精以求民瘼而

答

主知者則具見於是集中一披是集知皆肫然至性之所結藹然至情之所流而浩然至大至剛之氣之所磅礴而充塞也公以進士起家爲商邱令發奸摘伏號爲神明遂膺

上考擢刑曹遷比部正色立朝不徇不阿多所建白以憂
去在籍七年朝野莫不想望風采

聖祖皇帝特詔起 公超授浙江布政使甫蒞任一切陋規皆汰

之省糧袋捐兌耗均田畝清地丁

宸衷嘉異遂晉巡撫 公攜襖被一肩書卷數簾自藩署入轅

觀者太息暮年凡有益於全省者立奏行之時錢塘江逼
近杭城坍刷日甚潮汐洶湧居民震驚 公爲文以祭江

神是日狂飈撲空吹水皆立從吏失色以姑避勸 公叱

之屹立不動須臾潮忽退距祭所僅百餘步耳嗣後潮汐

不逼塘 公相形施築得奏功焉蓋 公之至誠感神其

見於文告閒者多此類也是歲 公以會審紅苗事往湖

南

聖祖以其地積習相仍私徼無藝欲釐剔之久矣念非 公莫可任者遂有偏沅之

命 公至則正身率屬飛檄郡縣告以大法小廉之意私派有禁重耗有禁雜稅有禁歇保有禁糾其尤無良忠苦民者他若驛站鹽引兵餉漕運一經裁酌兵民兩安工商交便舉湖甫積習之蔓延者掃除而更張之廓如也 公推誠待人 不立崖岸而於善惡之介義利之關辨之甚嚴凜乎其不可拔在湖八年所推薦多至大位不欲使人知其以貪黷掛彈章以獷黠從吏議者亦往往而有至於同官輒破除情面不爲苟同是以忌 公者爭相齟齬幸

聖祖知 公有素每論天下清官必爲 公首屈一指媒孽者不得入卒得久於其位以竟其設施凡 公之移風易俗籌

盡於八年閒者蓋有奮不顧身瀕危殆而不悔者也洎乎

晚年

帝眷日隆遂擢總憲忠義之忱老而彌篤蹇蹇諤諤無所依違
及晉大司農部務紛然卯出酉入一切文移必手自檢閱
隆冬暑短恆翦燭坐省漏下四鼓乃已雖積勞成疾不少
輟天下方謂公且旦夕入相而公物矣悲夫廷璐嘗
流覽詩書至於稷契陳謨周召作誥未嘗不歎古大臣遭
逢明聖一德一心其所以贊襄而左右之者如是其款曲
而深至也自漢唐以來名臣奏疏不爲不多卒未有如謨
誥比者抑亦所遇使然歟惟我天子之特立獨行荷
聖祖仁皇帝之眷注始終保全試盤錯而不疑聞流言而不信所
過殆與稷契周召同其邁漢唐名臣也遠矣以漢唐名臣

之奏疏傳之至今觀者猶爲之動容而變色況當吾世而
有如陳謨作誥之休者哉況其門下士也哉憶廷璐少時
侍先文端公教以立身行己居官治民之道及戊戌歲
幸出大賢之門每晉謁必以古人大節相勗依依猶昨日
事今先文端下世已三十一年公之沒亦十有八年
世宗憲皇帝追念舊勞頻加異數

今上復重勸忠之典公與先文端並崇祀賢良祠而廷璐
之無似夙夜兢兢惟恐隕越悵望音容邈不可得敬披是
集盡然不知涕泗之交頤也爰序其梗槩而書之簡端以
歸侗敦侗敦方

簡任鹺郵蓋公舊治處也浙中咸謂繩其祖武云

乾隆三年歲次戊午仲冬月桐城受業張廷璐敬識於澄

江使院

趙恭毅公贍藁序

夫文之用大矣所以綜緯人事章明義類宣底滯而暢皇極扶彝訓以秩大猷故宗臣碩輔命簡序烈代有神著非如雕鏤藻績剏精而不適於用也

武進恭毅趙公清節重望海內冠冕始以名進士起家縣令治行稱最入尚書省益懋幹勤既而家居有終焉之志聖祖以浙藩寄重非公莫可超授方面

恩眷日隆繼而擁旌旄於楚越筦歲計于大農厯踐中外越數十年門可羅雀益無儲粟凡前政之宜以時變通者公皆精心擘畫累章上請力除民瘼痛斷根株海內望公如雪山冰壑寒芒照人巖巖稜稜屹不可犯易曰天地交而萬物通上下交而其志同也唯 公膺

聖主特達之知激昂風猷蹇諤自任

主聖臣直前載罕儔解紘操徽動中機要所以物無潛蠹風無
墮隳後之人覽 公之作則 公之秉心宣力匪躬渙羣
其瓌偉英儻命世卓立之槩自可想見也 公少警悟下
筆不少休既從仕中外一切章奏符檄文告藪萃填委皆
手自裁決周悉物情至平時記序銘贊等非有關於彝教
則謝不爲爲則皆其可傳者前後疊司文衡多所甄識廿
餘年間相望臺省 公既歿而道益光議者以爲汲長孺
之鯁直趙張三王之政事山吏部之鑒裁楊關西之清白
公皆兼而有之宜其根極化原裁成雅誥卓爾宏大泊
然深微參古名臣作者之列而無媿也嗣孫副使君侗敦
永惟先烈鏗 公遺文謂本以文字受知忝預南宮薦士

之丁遠垂鍼示見屬序言敢緣仰止之誠用展藉茅之敬
至於歷官年月及終始

褒卹之典詳在

國史此不復云時乾隆己未秋九月錢塘受業徐本拜誤

三月廿五日

十一日

趙恭毅公贖藁序

古之君子志道德而薄功名先器識而後文藝彼固各有
所重也夫立德立功立言同爲不朽孔子頌堯成功文章
必及焉功名烏乎薄文藝烏乎後蓋道積於中則功之成
也不過時至而事起德成於已則言之立也特自道其中
之所有耳功名文章皆道德與器識之贖焉者非故薄之
非故後之舉其本而末已該也戶部尙書趙恭毅公清忠
雙亮爲

本朝名臣功業見於章奏性情發於詩文然公之志所重不
在此此特公所贖者故所著多散佚不盡存公沒後逾二
十年公之孫浙江按察司副使侗敦始搜輯遺文刻之名
之曰贖稿體公志也歲丁巳紱奉

命祭告夏禹王陵副使陪祀公事既畢屬爲序文悚然不敢承
蓋公之德望天下仰之若泰山北斗莫不願見其著述以
志嚮往何藉於晚進之序之願獨念自少時讀書數當世
名公卿卽知仰慕公而願學焉比成進士則公之冢嗣實
爲榜首年家子宜得進見又念公清介無私謁且方爲左
都御史總持風紀益不當謁於是自

朝廟公事相見一揖外未嘗登公之堂者垂十年然公乃獨
以此相賞康熙丁酉鄉試有

詔令九卿各舉所知往典試事公遂首舉絀名因得充雲南正
考官益自感奮務欲學公之爲人自是又十餘年終未嘗
登公之堂比公薨始爲輓詞登堂哭公以廉頑立懦推公
爲百世之師蓋絀自少時敬慕公幸得爲年家子又知而

舉之乃始終未乃登堂一請訓誨一旦得公文彙讀之以
罄生平願學之意公之孫又不以其菲薄俾序諸首簡豈
非榮幸之至也哉公由名進士起家商邱令內遷部郎以
執法乞假歸

聖祖仁皇帝特授浙江布政使旋陞巡撫未幾調湖南入總臺綱
轉戶部尙書掌國計十餘年危言讜論聞天下訐謔入

告者外人猶不能盡知也今讀公賸稿奏疏三卷文告三卷
雜文纔二卷亦皆有闢名教者蓋公之文章皆公之功業
公之功業皆公之道德而器識亦因以見焉典論目文章
爲經國之大業權文公序崔祐甫集謂作必有補於時公
斯集其當之矣公諱申喬字松伍江南之武進縣人天下
士大夫識與不識莫敢名字公皆稱爲趙武進云乾隆二

走才秀之月五日

年八月三日年眷姪臨川李紱頓首拜撰

几例

蓋聞主聖則臣直，謇謇諤諤，雖大臣之體固然，然必上有聖明之主，而後下有剴切之臣，理勢然也。惟我

聖祖仁皇帝視民如傷，求治若渴，起先臣於浙藩，不一年而晉巡

撫，又不一年而調湖南，內擢總憲，旋任司農，凡有條奏，曲加審納，連章參劾，而不以為苛；坐名薦舉，而不以為黨；一事再三執奏，而不以為瀆；陳一言獨梗，盈廷而不以為立異。是以民隱不致壅於

上聞，吏治不難底於釐剔，惟

聖主容人之所不能容，斯臣下言人之所不敢言。迄今取其文詞而三覆之，猶可想見

一德之休風，庶幾攀附

千秋之盛軌集奏疏卷第一卷第二卷第三

先恭毅雅不輕以筆墨許人苟其人之行誼不足信今而傳後欲求其片言隻字稍爲掄揚卽百請不一應及至古賢之遺蹟忠孝節烈之芳躅雖塵埋荒忽庸耳俗目之所不接則必廣搜博訪爲之大書特書皇皇惟恐不及非必置冰炭於胸中亦由其臭味之類否耳故筆墨不多及而其所及者皆足信今而傳後者也集序記誌述卷第四

先恭毅前後歷宦三十餘年由縣令起家至大司農未嘗延一幕客亦絕不假手吏胥一切兵刑錢穀簿書期會皆親自裁決隨判隨行多不起草閒有大案落橐又苦不自檢收故商邱一任政蹟缺焉惟先大夫裘萼公隨任浙省則爲之掇拾而編次之故著有藁案畧存一集及調撫偏

沉先大夫往來數數不得久待詩又入直

內廷故楚南案牘家無全橐賴偏沉士民前有趙公實政錄之刻繼有從事何祖柱自治官書之刻雖多缺畧而八年南楚苦心猶得什存六七者二書之功居多今謹搜羅彙輯一一讀之見其上行之委婉下行之剴切持已之廉潔察事之精詳嚴厲峭直中亦復纏綿愷惻片片赤心有流露於行閒而不可磨滅者集詳咨示檄及批詳卷第五卷第六卷第七

文章之體製不一序記誌述而外爲文爲書爲詩爲策問爲訓誡爲書後更或言事爲呈詞著不一體體不數作要皆綱常風化之所關

國計民生之所係非苟而已也至若詞賦之類於雕蟲應酬

之流爲闕焉皆先彙之所不一見者集雜著卷第八

孫男何敷謹誠

皇清 戶部 尚書 贈太 子太 保諡 恭毅 趙公 諱 申 喬像

吏部尚書署理陝西總督事務加一級受業劉於義填諱



宮保謚恭毅趙公贊

惟我夫子應運篤生直方以大剛介而清

聖祖羅才甲科顯榮筮仕商邑循績鏗錡敷歷刑曹號起廷平
請假歸田以讀以耕

帝心簡在薇垣駐旌尋擁旌節撫越移荆鋤貪挾弊電掣雷轟
入掌邦憲晉秩地卿不吐不茹勿撓勿撓勤官死職朝野
哀并備蒙恤典

賜祭易名

世宗御宇追維老成爲加宮保

褒寵莫京廣啟賢良歲祀酒牲惟我夫子自結

聖明挺挺孤忠祇秉一誠忝予小子後矣其瞻敬懷丰采是則
是程

受業劉於義再拜

趙恭毅公贍藥目錄

孫男侗敬謹編

卷第一

奏疏一

浙撫任奏疏十八章

偏撫任奏疏摺二十章

卷第二

奏疏二

偏撫任奏疏三十章

卷第三

奏疏三

偏撫任奏疏八章 附賫供

總憲任奏疏摺十章

卷之四

司農任奏疏摺十四章

議

司農任議七條

卷第四

序記誌述

序六首

記十二首

誌銘三首

行述二首

卷第五

詳咨

浙藩任詳文二十首

偏撫任咨文十六首

總憲任咨文一首

卷第六

示檄

浙撫任告示二則

偏撫任告示十八則

浙藩任牌檄三則

偏撫任牌檄三十六則

卷第七

批詳

偏撫任批詳一百二十三條

卷第八

雜著

雜文十三首

一百二十三首

哀辭一首

策問十二道

書六首

三十六首

呈九首

三首

示誠一首

示十八首

書後三首

三首

詩四十三首

對句七聯

趙恭毅公贖藁目錄

十六首

趙恭毅公廣葉卷第一

孫男侗敬謹

奏疏

恭謝

天恩疏

以下浙撫任

臣江左豎儒三年部屬七載里居荷 皇上隆恩 特諭吏部

行文地方官調

臣引

見從優授爲浙江布政使蒞任以來寸

長未效乃又蒙

皇上深恩陞

臣

爲浙江巡撫臣自願何人屢

邀 高厚聞

命之下感極涕零

臣

竊思一歲再遷且以藩司

陞任本省誠千古不易逢之曠典我

朝不數見之殊榮乃以

一介孤踪膺茲

寵遇無論苟且營私

臣

罪難追卽循分供職

亦爲上負

主知耿耿私衷實慙且懼惟有勉竭駑駘鞠躬盡

瘁澄清屬吏潔已愛民圖報 聖主不次之恩於萬一耳

恭謝

天恩領到

御書疏

竊臣受命撫浙之日卽具疏恭請 陛見正在束裝以待今

於康熙四十一年三月二十二日臣男山西臨汾知縣臣趙鳳

詔祇領 皇上駕幸五臺行宮頒賜臣 御書一卷轉齎到浙

臣隨率所屬文武各官出郊跪迎至署恭設香案望闕叩頭

祇受啟封敬覽乃臨董其昌所錄崔子玉座右銘伏觀 天章

睿藻幾奪化工鳳舞龍翔光彩輝映臣舒卷甫竟恍如仰觀

天顏躬聆 聖訓竊念臣本一介豎儒孤踪寡合自假歸田里

杜門養疴久不掛人齒頰荷蒙 皇上特授浙藩未及一載旋

陞巡撫非常隆遇頂踵難酬惟恐奉職無狀上累 聖主知人

之明日夕冰兢不遑寢食乃復蒙 皇上眷念微臣遠頒 宸

翰迺憶上年正月二十九日臣 陛辭跪請 聖訓時求 賜

御書 皇上面諭且待一年之後屈指至今適當卅歲是區區

犬馬日廬 宸衷 天語如春歲時不爽言念及此臣雖肝腦塗地眞未足報 聖明萬一也接閱臣男手稟內開二月十二日 皇上在行宮召見臣男惓惓垂問微臣隨有侍衛口傳溫旨臣數千里外聞之感而且愧自念受 皇上不次厚恩卽飲地方勺水亦爲逾分不意 皇上愛臣信臣過加褒獎至於如此又臣男鳳詔年少未諳吏事初授山西沁水知縣待罪七載蒙 恩特調臨汾臣寓書戒勉毋得輕自暴棄以玷祖父而負 朝廷而地方繁劇愆過實多 皇上不加譴責乃以微員召見行在併 賜御書帑金曠世殊榮更出意外又臣胞弟新選廣西遷江知縣臣趙申季寄臣家書備述上年十一月十三日引見時 皇上詢及閣臣知係臣弟顧問再三臣弟感激涕零亦深自努力以圖報效臣自願何人父子兄弟並受

皇朝通志卷之二十一

國恩至優極渥但識愚才短無能仰答 知遇之隆惟有益自
刻勵潔已愛民戒勛子弟鞠躬盡職倘有一毫不肖一念欺
君是匪徒得罪 皇上為國法所難寬抑且得罪於天下萬世
為名教所不容矣除奉到 御書裝潢摹石傳為世寶外謹恭
疏奏謝 臣言有盡 臣心無窮伏祈 皇上睿鑒施行

特參貪酷縣令以飭官方疏

竊 臣才本疎庸告歸田里荷蒙 聖主高厚隆恩 召 臣詣
闕得以瞻仰 天顏又從優授 臣浙江布政使蒞任一載寸長
未効又蒙 皇上不拘常例擢 臣浙江巡撫受 恩感激殆有
難言伏見我 皇上宵旰靡寧 恩膏疊沛無非汲汲以安民
為務而安民必先察吏 皇上察吏之法首在獎廉懲貪而倦
倦加意者尤在親民之官故於縣令初授時概令引 見以察

其才品之高下循良有守者不惜破格而優擢之是 皇上之
期望諸臣如此其厚而激勸諸臣又如此其深且至也 臣思下
吏敗檢不端皆大吏有以致之潔已率下先自 臣始故受事三
日卽曉諭屬僚如 臣有一毫不肖一事非法卽令其據實上
聞願甘重典倘司道苛求下屬知府勒索州縣及州縣虐詐小
民定以白簡從事兩浙官民諒其間知且於屬員公謁時輒宣
布 德意勉其砥操清白殫力撫綏亦謂稍有肺肝當必滌慮
洗心以恪遵 功令不謂猶有敗類貪污縱蠹戕民者誠難一
日姑容卽甫經離任而紛紛告發者亦不敢置而不究如山陰
縣知縣顧 海鹽縣知縣關 海甯縣終養知縣王 麗水縣
知縣王 四員據司道府各揭報前來合 臣訪聞無異此四官
者或徵糧而私加火耗逼納積零或編審而橫索陋規搜查稅

契或收漕南而勒費折乾或乘詞訟而聽役通賄或縱蠹捕而誣良斃命或蓋生祠而科派擾民有玷官箴均難寬貸所當特疏糾參請旨革職與有名蠹犯一併提問以飭官方者也

特參旗兵打詐等事疏

該臣看得莊元信之父莊成名係徐世美故父徐德雲之壯丁也德雲係鑲黃旗漢軍兵丁於順治八年間隨征舟山擄得成名回家取名牙住配有妻室效力多年積勞成疾至康熙二十年成名之舅邵伯元年邁無嗣出銀三百兩懇德雲贖放成名身妻子女爲民德雲與子徐世美寫立願放爲民執照伯元復具呈前任將軍臣馬哈達批發杭捕同知轉行仁和縣取結安插爲民現有檔案可考豈世美倚勢橫行復屢向成名索詐銀錢成名不得已陸續又付銀三百五十兩居間證佐供鑿世美

又於上年十月初七等日乘成名身故向成名之子莊元信索詐貲財毀其家伙靈座且入室登樓辱及孀婦欲逼元信家口仍復歸旗致元信之舅祖母邵沈氏具控理事同知多永俄審供具詳并據元信具詞到臣呈驗徐德雲父子親押執照仁和縣安插告示及世美借票等項臣批行理事同知查報復訂期於公衙門會審乃世美不靜候審斷膽於聽審時糾合多人在公衙門前將元信橫毆搶去執照等項目無官法一至於此則元信平日之被虐可槩見矣查莊成名既於康熙二十年贖身釋放爲民迄今已二十餘年世美又屢行索詐仍逼歸旗無論情理所不容且恐駐防之處賣身贖回者不一其人若贖已久而又索詐及詐不遂而仍逼歸旗效尤者眾良民勢必不安我皇上覆育羣生無一物不得其所臣荷隆恩畀以撫綏之

定考錄之序卷之三

四

任目擊旗兵擾民而不上聞臣實負職相應題明請旨嚴飭以安民生則兩浙編戶感沐皇仁於無極矣再臣遵例移送將軍丹副都統阿俱不畫題合并陳明

遵旨詳議懇賜給封疏

康熙四十一年五月初一日接內閣移咨內開禮部覆原任浙江巡撫張志棟疏議將明季紹興府知府湯紹恩褒封之處無庸議其致祭之處准行於康熙四十一年四月十五日大學士伊桑阿等折本啟奏奉旨湯紹恩應否給封致祭之處著問新任巡撫趙申喬令其詳議具奏欽此欽遵移咨到臣仰見我皇上以利濟民生為念以崇報功德為心又不以臣為愚陋而下問焉臣敢不詳加酌議以上副聖天子倦倦問察至意查湯紹恩自明嘉靖開來守紹興因地多水患特於三江海

口築城四百餘丈建闢二十八洞啟閉以時旱潦無害民感其
惠立祠尸祝迨我 朝定鼎以來洩水驅沙靈異尤著其事蹟
已悉前撫臣張志棟疏中不敢贅敘以瀆 宸聽臣再考之誌
書訪之輿論竊謂紹恩遺愛至今田廬得免漂沒盡力農桑其
利在民沙瘠盡爲膏腴增益課賦其功在 國紹郡每當水泛
沙淤官民赴祠祈禱立時沙退水流其效靈不獨在明季而且
在 本朝禦災捍患利賴實多若非仰荷 聖恩未足俯酬嘉
績以故聞 命之日士民環庭呼籲情詞懇切倘蒙 皇上鑒
採輿忱 敕賜褒封祀典則傳之史冊千秋萬世永戴 天施
旣以慰前代之勞臣而亦使屬在臣工咸知殫力爲民興利除
害雖經身後尙沐 殊榮其有裨於吏治民生更非淺鮮也臣
謹遵 旨詳議具題

鹽課歸縣徵收竈戶輸將利便疏

該臣看得兩浙鹽課錢糧自康熙二十七年改歸附縣徵收絕無差擾派累之弊竈困頓甦共樂輸將爭先恐後至三十六年復歸場員徵解弊端日生竈丁苦累是以三十八年 皇上南巡江南松屬竈課奉有著交地方官之 旨而浙省竈丁以鹽課事同一例自必咸歸縣徵斯時萬竈同聲歡騰遍野隨經前撫臣張志棟具題請將浙省所屬竈課概歸地方官徵收部覆毋庸議在案先據清龍等場竈戶石大成等具詞援照松江之例竈課歸縣徵收請題前來經前撫臣批布政司會同運司查議詳奪去後茲據詳稱竈戶在場完課弊累不一如純良小竈赴場完課不無額外之需更有場霸包攬納蝕不完甚至累官賠墊或累竈戶重完場員微末不能詰治且場署俱設海

濱而無城郭收銀在櫃必需簽派殷實竈丁看守迨起解錢糧之時又必輸差押送飯食人工費出竈戶且各場大使員下額設僅止一二書役其秤收給票書算完欠繕造冊籍一切公私事件無不差撥竈丁承直場徵竈課委果不便於民亟請會題將浙省杭嘉甯紹台溫所屬竈課照依江南松屬各場一例歸於附近州縣立櫃徵收照民戶條銀自封投櫃截票甯家以從民便至橫浦場竈課前經歸縣附於松屬婁縣徵解今據各竈戶陸璋等呈稱婁縣距場百有餘里往返必須三日泖湖難越潮汐洶湧有候潮遠涉費累願歸入就近之平湖縣徵解應如所請並懇附疏題明等因前來臣惟我皇上聖德同天愛民如子恐一夫不獲其所時屢 聖懷凡屬編氓共沐 覆幬慶享昇平盛治今查竈課一項在場完納竈丁苦累難堪籲呼彌

切咸懇仍歸縣徵雖前經部議不准何敢再爲瀆聽但事關民隱何敢置不上聞相應據情題請仰祈皇上俯念江浙一視同仁將浙屬鹽課概行歸縣徵收橫浦一場附於平邑就近完納倘蒙俞允則輸將利便竈困甦而國課裕矣請增鄉試解額以光文治疏

恭惟我皇上文教覃敷人材蔚起凡懷瑾握瑜之士莫不願進於天子之廷特以選取既有定額掄拔不能盡周山陬海澨望恩於闕下者非一日矣浙省文章科第素與江南相頡頏久荷聖明洞鑒故浙省入學增額與江南同特差學院與江南同每舉人一名取科舉一百名亦與江南同已卯科特恩廣額舉人十名亦與江南同皇上之加恩於浙者無不與江南一視而同仁也但查浙省解額自康熙三十五年丙子

科部議增定七十一名載入科場條例今屆壬午科亦應照舊額取中而每科入場士子不下萬二千人實與江南相等查江南解額見在八十三名以浙省較之少額十二名副榜亦少三名且江西省應試者僅得浙省三分之一其中額七十五名視浙省尚多四名副榜亦多一名是浙省中額非惟不得比於江南并不得同於江右則額少人多難免遺珠之慮以故歲值寶興士子環擁臣署僉詞請題選恩廣額臣竊念我皇上作人雅化千古獨隆倘草茅寒賤限於進取青雲路遠皓首途窮當亦聖心所不忍臣荷皇上超擢殊恩目觀士子觀光念切呼籲情殷而壅不上聞是臣負士子之愆小而負皇上之罪大矣伏查康熙三十五年雲南撫臣疏請雲南中額比照四川又貴州撫臣疏請貴州中額比照廣西俱蒙特旨俞允

夫以滇黔天末遠方猶得援照他省增額況浙省人文不亞江南尤爲 聖明所洞悉者乎雖部臣於康熙三十五年定議之數原照順治十七年舊額酌增有差但 國家養士數十年教澤日深文風亦日盛今日之浙省實不同於昔年之浙省敢祈 皇上破格恩施將鄉試解額照江南例取中副榜亦循例並增則多士益踴躍於功名而 聖朝師濟之休且軼唐虞三代而上之矣

請增鄉試房考疏

該臣 看得浙江素稱才藪多士蔚興今當壬午大比之年臣已會疏題請增額現在候 旨欽遵惟是入闈閱卷除 欽差考試官外例取同考官分閱查浙省舊例止用一十三員但應試士子每科不下萬二千人以三場合計約共三萬餘卷以一十

三員分閱每員應二千餘卷夫一人之目力有限場中之時日無多自閱卷以至放榜爲期不過二十日以二十日之內欲盡此二千餘卷而一一去取高下之卷積如山目迷五色雖責以悉心校閱其勢有所不能故撤棘之後士子領視落卷考官僅略加點抹甚或句讀差譌以致魚目誤收奇材見擯使寒士三年辛苦埋沒無聞良可惜也若執此以罪考官彼已窮日之力實亦無可如何然以掄才大典任其草率竣事苟且塞責不幾大負我皇上闢門籲俊之盛心乎臣查浙省鄉試例用易詩二經房考各四員書經房考三員春秋禮記房考各一員今請除春秋禮記不增外易詩書三經各增房考一員連舊例共用一十六員閱卷之官旣多則分卷之數自少庶各官得以悉心校閱而入闈士子咸沐皇上造就之恩於罔極矣至於日用

供給等項總於科場經費額內核銷無庸添設再查康熙三十五年丙子科江西撫臣請增房考二員已蒙 俞允其餘他省俱未請增以 臣愚見當此四海同文羣才思奮不獨浙省爲然應否通行各大省俱照江西例酌增房考二三員俾士子無不見之長而 國家收得人之慶 洪恩出自 聖裁非 臣所敢擅議也

特參知府勒索下屬疏

該 臣 看得温州府知府趙 藐視 功令逼勒下屬因盤查府庫差鄭庫吏傳諭瑞安縣知縣王晉那借庫銀三百兩又稱剔查倉弊差林糧書索食米一百二十石又催四十年未完解司銀兩差役朱永持票併催水腳銀五十四兩雖該縣稱並無動那與受情弊而趙 身爲知府恃權勒索屬吏吞聲闔郡積怨

所當特疏糾參請旨解任質審以信功令者也大抵浙省今日吏治之弊俱起於苟且因循以致上下相蒙多不可問臣荷皇上特恩超擢若不大破積習嚴加釐飭則無以振惰弛而肅法紀所以參處知縣之後嚴查通勒下屬之知府續卽糾參懲一以儆百而吏治庶可澄清矣除將該府印信摘取委員署理外臣謹會題

再參知府扣留溢解兵餉疏

該臣看得浙省外府各標營兵餉俱撥各州縣地丁銀兩解府給發臣上年四月任布政司時訪聞州縣解府有胥役之捐勒有彈兌之折耗卽詳明前任撫臣張志棟將兵餉悉令營員赴州縣自領以省浮費而恤窮黎豈意温州府知府趙口貪婪成性見兵餉歸縣不遂谿壑因將樂清縣溢解銀九百六十兩扣

留不發延今一載有餘以致該縣四十年司餉懸解查該府逼索下屬據瑞安縣申報臣已特疏糾參茲又據樂清縣詳報併兩司揭報似此貪恣劣員誠難一日姑容所當再行糾參請旨革職以便嚴追究擬庶各府皆知功令而帑餉不致侵虧矣

閒員可併劇吏當留仰祈 睿裁疏

該臣看得松江分司所轄袁浦青村浦東下砂一二三等六場鹽課錢糧久經奉 旨交與地方官徵收在案是該分司係屬閒員可以裁汰而所轄之下砂一二三等場內可裁併者亦應裁併經臣行司會議詳覆去後今據詳稱松江分司所轄袁浦等場鹽課錢糧歸併縣徵該分司已無督催之責誠屬閒員相應議裁其員下僅有稽查漲復蕩地陞科並六場達部由單事

務就近歸併嘉興分司管理至袁浦等場內止有下砂三場因
地方水淡停煎該大使已無稽煎責任亦屬閒員似當一併議
裁該大使事務應併下砂二場管理均可兼之無誤等因前來
臣查松江分司一官並下砂三場大使一員已無督課稽煎之
責似應裁去其各事務歸併就近之嘉興分司下砂二場管理
均堪兼併相應具題又據該司等詳稱杭州府總捕同知一官
省會叢祿之地奸宄易生所轄塘棲諸處烟戶繁盛山澤險遠
當茲盛世雖萑苻屏跡而鼠竊之徒所在時有是捕盜同知
職守綦重前經議裁併歸船政同知但總捕同知陳悅旦現今
在任尙未併歸兼理猶得專心料理捕務若使將來離任恐船
政同知係司漕之官責以兼理捕務勢必顧此失彼貽誤堪虞
將總捕同知一官議請當留又稱杭州府屬織染局大使一缺

金華府蘭谿縣澱水驛驛丞一缺內部久停銓補議將織染局大使事務歸杭州府知事兼理澱水驛驛丞事務歸蘭谿縣隨堂兼理其織染局大使印信一顆送部銷燬等因會議前來相應一併題明候部議奪

恪遵禁止五經之舊例仰體不必禁止之 新繪據實陳

明以重人才以揚文治疏

竊查科場條例內開有作五經者恐有闕節之嫌以後應行禁止等語近聞邸鈔順天鄉試監生莊令輿俞長策俱以五經完卷監試臣節什等具題部覆毋容議奉 上諭莊令輿俞長策俱授爲舉人准其會試嗣後願做五經者不必禁止作何定例著九卿詹事科道會議具奏欽此欽遵中外士子傳播 皇言人人感泣以爲我 皇上愛士作人不拘成格凡屬通經有志

之士莫不踴躍鼓舞以冀觀光臣目擊情形實有一事抱疚於心不敢自避罪譴而壅於上聞者敬爲我皇上陳之本年浙省鄉試臣叨任監臨八月初十日據受卷官仁和縣知縣謝儼呈堂有錢塘縣學生員葉方體四書五經文二十三篇完卷真草俱全例應貼出臣隨率提調監試司道各官公同驗明時本生交卷未出卽喚至詰問因何違禁多篇據該生稟稱書生不諳定例止因功名心切平日習過五經故作多篇等語及遵例發貼而該生哀籲求免願換卷片謄淚隨聲下臣閱其真草共四十六篇字畫俱無潦草其文字雖平常無奇而文理皆屬清通五經俱不失旨若與七藝不完及真草全無者概加擯斥殊可惋惜欲卽爲入告又以久遵禁例未敢妄瀆宸聰臣從憐才起見查場內原遵例多備空白卷遇有遺失錯污等項許

與順天並增解額其間亦有通經自獻思欲上報 君恩者益見 聖世多材固無分於疆界而文風蔚起誠超絕於古今耳除本生葉方體三場墨卷共四本行布政司提取另封送部外 臣特恭疏題明伏祈 皇上睿鑒施行

特參貪劣縣令以肅官方疏

該 臣 看得親民莫如縣令非革除陋弊則民困不蘇非擯絕奸胥則民蠹不去 臣 嚴飭司道府誠勉屬縣潔已愛民以無負皇上休養元元之意豈意猶有貪婪恣虐縱蠹流殃如壽昌縣知縣佟 者據該司道府各揭報前來與 臣 訪聞無異此一官者按里而派收節禮立戶而索取陋規違禁用刑而縱役免差扣剋祭典而虧損物價穢聲彰著民怨沸騰所當亟行糾參請旨革職以便究擬者也

特參知府勒索餽送疏

該臣看得海鹽縣革職知縣關國俊虧空錢糧一案或由於上司之勒索餽送或由於知縣之那新掩舊知府之扶同出結准部咨奉 旨行 臣一併嚴行審明具題到日再議 臣卽備行布按二司糧儲道檄提關國俊到省嚴審侵空實情併有無勒索餽送去後據關國俊呈稱本府各有勒取借餽銀兩不等隨批行兩司提究解報又據嘉興府知府佟賦偉詳稱各屬縣向有餽送及陋規等項而知府亦有餽送撫臬糧驛各上司節禮賀儀以及芹敬等項又代賠原任嘉定縣知縣范宏毅虧空銀米開送各上司收受餽送銀兩數目冊一本詳報到 臣 并行兩司提訊確供去後茲據審覆到 臣查佟賦偉果有餽送上司不應俟奉部提取關國俊審供始行具首有無虛實尙未可定既據

開報難置不問以啟弊端又閱冊開前撫等收受餽送俱有衙役管家過付收繳姓名未經質審終難遽結除在浙各官現在行司取供併提有名衙役家人究質其外省各官候旨另行取供提質外惟是關國俊供佟賦偉勒索餽送銀兩佟賦偉亦已自認收受相應照貪官例請旨將佟賦偉革職以便究擬者也再查佟賦偉詳稱犯罪未發自首免罪是明恃免罪之條欲爲先發之計但賦偉詳報關國俊虧空時並未將收受餽送情節首明及臣准部文檄司提審始行出首掩飾又顯稱自首免罪旣婪贓於前又諉卸於後官箴有玷法紀奚容除將佟賦偉所開原冊鈔錄送部外臣謹會題

請旨行取事疏

該臣看得行取之員原備臺垣之選必須廉能素著勤政愛民

者方爲無負斯舉 臣荷 皇上隆恩不次超擢愧無寸長仰答
高厚茲准部咨行取敢不矢公矢慎詳加考核仰副 旁求
至意有建德縣知縣璩廷祐廉以視躬才堪敷政本禮讓以善
俗教化克興寓撫字於催科輸將樂赴平心折獄圍扉無久禁
之冤弭盜除姦潢池無伏戎之警惠政多端俸深合例任內雖
無卓異薦舉亦無錢糧盜案允堪行取以備擢用據該司等備
具事實考語冊結詳報前來相應具題再查臨海縣知縣邢芳
奕宣平縣知縣韓宗綱實係清廉愛民才猷敏達但邢芳奕因
溼爛倉穀降級已經賠補還倉現請開復又因魏吉生海洋被
劫一案題參疏防例有處分韓宗綱任內有未完康熙三十九
四十兩年錢糧俱已全完現請開復又署青田縣事因連雲寺
僧人失盜一案亦有處分雖與例不符難列薦剡然 臣屬七十

餘縣似此二員廉苦自持勤勞不怠者實不易見若拘於定例
壅不上聞則人才難得臣疾實深所當一併題明伏祈皇
上睿鑒以鼓吏治者也

特參貪酷病廢縣令疏

竊惟官吏之賢否關乎民生之休戚而縣令一官與民最親尤
爲緊要必廉惠慈祥愛養百姓精明強幹方稱明牧臣自奉
命撫浙仰體皇上察吏安民之至意凡大小屬員耳提面命
誠諭叮嚀務令勤修職業潔已愛民閒有改過自新者益加獎
勉其怙惡不悛者察確糾參在案將謂吏治可清官方知做矣
乃猶有長興縣知縣曹○貪虐肆行穢蹟彰著難以姑留又新
昌縣知縣易○患病尪羸步履維艱貽誤政事臣訪聞已確并
據司府揭報前來此二官者或信囊勒索恣貪婪而貸借富民

濫用嚴刑任株連而疲斃人命或臥病而舉步艱難政弛而諸事隳廢誠難一口姑容以貽民害以誤地方所當特疏糾參請旨將曹○革職併有名蠹役一併嚴提究審易○飭部議處以清吏治而肅官方者也

請修禹陵疏

據布政使詳稱康熙四十一年八月二十五日酉時禹陵大殿西首被龍風吹到○諭祭等碑並遭傾仆且年深歲久大殿木植俱已朽壞現今傾圮之一間約費千餘金方可修築若大殿通修改造工價浩繁無項可動詳明題請修葺前來○臣伏念神禹廟功萬世永賴歷代尊崇而我○皇上追維明德頻加祀典復○御書地平天成匾額廟貌益尊觀瞻愈重乃今殿西傾圮若不修築漸及坍塌且年深歲久殿中東二間樑柱亦皆朽腐

似應鳩工庀材概行改造第工費浩繁無項可動理合題明仰
請 敕部議亟爲修葺以崇祀典 臣謹會題

仰體 聖主崇儒至意請頒先師誕降隆儀疏

竊惟覆載者天地終古如斯生成者聖人萬世不敝然而天地
之生莫考祇對越於圜丘方澤之間聖人之生有期宜推廣於
秋藻春芹之外布昭大典必自 皇朝恭惟我 皇上 道隆
往聖 治越前王宗洙泗之微傳致中和而位育闡經書之奧
旨敷教化於臣民誠謂自生民以來未有盛於孔子故內而國
學外而郡邑俱奉 旨建立文廟 命有司朔望行香春秋致
祭又特 御書萬世師表匾額頒行天下懸之學宮是我 皇
上崇禮孔子之盛典固葺以加而孔子之爲萬世師表永立人
極者亦不待 臣之煩稱侈述也惟是 臣一介豎儒荷蒙 皇上

不次隆恩 簡命撫浙壬午鄉試忝任監臨目睹多士濟濟文
風丕振感斯文之未墜念聖學之淵源伏查闕里祀典於每年
八月二十七日孔子誕生之辰曲阜縣官祭享洙泗書院而直
省郡邑學宮不聞各官詣廟士子展拜緣未奉有定例以致典
禮闕焉臣前任藩司時曾援照江南之例具詳督撫通飭閩省
儒學曉諭士民於每年八月二十七日孔子誕辰各詣文廟虔
誠拜禮遵行在案但修舉止於江浙而通行未及各省且未經
題請奉有 俞旨猶恐僅行於一時不克永垂之久遠臣愚以
為春秋俎豆已邀祀典之長馨而誕降祝釐更望隆儀之兼及
仰祈 敕下該部通行直隸各省於每歲孔子誕辰各官先期
齋戒二日不理刑名至期親詣文廟率領文武諸生行香拜賀
永定為例俾薄海內外咸知 聖朝尊崇孔子典禮有加無已

行見文治益隆人才蔚起共佐理於昇平臻皇圖於億萬矣

恭謝 天恩疏

以下備撰任

伏念臣本豎儒生逢盛世荷蒙皇上高厚隆恩破格超擢

涓埃未報負疚實深乃復奉恩綸轉補偏沅巡撫聞命之

日隨繕疏恭請陛見祇求聖訓又聞皇上閱視河工臣

卽星馳行在屢覲天顏疊聆天語書紳刻骨夢寐不忘

更荷聖恩准便道省墓澤被九泉又御灑宸翰賜督

撫箴綾字綬輯撫安匾額龍翔鳳翥光騰縹素之間日麗星輝

彩徹雲霞之表豈惟家珍而世寶抑且寓目而警心至於湖南

積困久悉聖聰特頒坐名諭旨起凋敝而躋熙恬誠曠世

之恩施幸躬膺夫帝賚二月三十日陛辭復蒙皇上

諭臣勉力做去欽承訓誠感激涕零惟是楚南幅幘遼闊民

卷之三十一 奏議 一

苗雜處臣才識短淺深懼隕越惟有仰遵 皇上綏輯撫安至
意殫心職業圖報 皇恩於萬一耳

恭繳 上諭疏

欽惟我 皇上心同天地德邁唐虞萬國咸甯猶厯已溺已飢
之慮一夫不獲獨深吾胞吾與之懷念湖南之民困難甦由陋
習之相沿未改乃於微臣 陛辭之日恭奉坐名 諭旨之頒
務使力除無藝輸將不苦於追呼庶幾休養有餘耕鑿咸安於
隴畝誠 聖朝之曠典而再造之隆施也臣 蒞任之日卽恭設
香案親捧宣讀一時臣民懽躍咸誦 皇仁至於泣下除騰黃
頒發曉示并建造 聖諭碑亭勒石永行遵守外所有原領
諭旨理合具疏恭繳

恭報遵 諭撫苗摺

竊照鎮溪草子紅苗出沒無常乘機剽掠邊民屢被侵擾上年
李豐等叩 闕一案 臣等遵 旨審實題准部覆奉 旨欽遵
在案我 皇上聖德神功函天蓋地威行絕域恩被荒陬而蠢
苗無知妄動何難發兵撲勦但 皇上至仁如天昆蟲草木猶
使並生蠢苗亦有血氣均屬 朝廷赤子 臣於本年二月三十
日叩辭 行在冒昧陳奏隨蒙 聖明有督撫難道不好招撫
之面諭 臣欽承 天語時刻在心第 臣衙門例受督臣節制未
便自專到任卽移咨督提諸臣會商而署督臣年遐齡署事未
久新督臣喻成龍今甫莅任隨咨商妥協已經會委署辰沅靖
道事衡永郴道參議張仕可齋 臣等草檄數百紙前赴鎮筸地
方責令熟苗持赴苗寨宣示 皇上德威令其革心向化如果
就撫情實 臣等卽親詣苗境面加慰撫併相度情形會疏題報

上請 聖裁指授善後方略倘其自絕生機罔知悔悟則請兵
合勦殄此苗頑今_臣等仰仗 皇上洪福先認真招撫一番但
生苗狡黠情僞難知必察其真心歸服方敢上 聞庶幾隆重
天威不致輕率取戾_臣面奉 諭旨已經數月恐厯 聖懷
合先具摺奏 聞

特參貪殘庸劣縣令疏

竊惟民生關乎吏治察吏乃可安民湖南地界邊遠土瘠民貧
向遭兵燹凋敝益甚仰賴我 皇上深仁轉覆厚澤涵濡億萬
黎黎得登衽席官斯土者自宜律身廉潔待下寬仁聽斷精詳
奉公盡職庶不負 聖主軫惜遠方至意_臣荷 皇上隆恩轉
撫湖南叩辭 行在 諭旨令_臣嚴飭大小屬員力減加耗盡
革私徼如仍有藐法不尊重爲民害者卽據實糾參從重治罪

煌煌 天語時刻銘衷莅任以來欽遵曉諭自司道以下知縣
以上首示以 皇上澄清吏治之 聖心再告以微臣受 恩
深重力圖報稱之愚意諄諄誠勉不啻再三又仰體 聖慈寬
宥已往不敢苛刻吹求冀其滌慮洗心湔除銅習乃猶有貪婪
敗檢橫徵濫刑者誠難一日姑容卽闢茸庸劣諸事廢弛者亦
難聽其尸位如巴陵縣知縣李○邵陽縣知縣盧○安仁縣知
縣馮○耒陽縣知縣蔡○據司道府各揭報前來合臣訪聞無
異此四員者或收課而額外濫賦借穀賣魚取利或勒派而按
里苛斂心紅柴炭私收或民命草菅用酷刑而無辜速斃或才
具庸闇任意玩而政務全隳均難縱居民上貽害地方所當據
實糾參請 旨將李○盧○馮○等革職與有名各犯一併提
問究擬并蔡○ 敕部嚴加議處以飭官箴臣謹會題

聖世百神效靈徵臣愚願難隱疏

臣仰荷 皇上隆恩轉補偏沅巡撫受事以來欽遵 聖訓察

吏安民凡屬員賢否地方利弊現在諮訪次第入告何敢越職

再言前任事但 臣在浙時實有一事關繫民生目擊心許不敢

壟於 上聞者查浙省錢塘江逼近杭城潮汛洶湧最爲險急

康熙四十年 臣任浙江藩司每見衝墮隄岸坍削田廬沿江居

民幾無寧宇上下馬塘俱難行走日夕焦心具詳前撫臣張志

棟繪圖題請蒙 俞允部議借支歲修款銀與築 臣復節俸捐

貲湊備工料委温州同知甘國奎董理其事圯者完之缺者補

之併築子塘以護塘基乃上年秋汛大潮一日兩至衝刷日甚

危險堪虞束手惶惶計無所出據士民籲稱江神有靈理宜祭

禱以冀迴瀾又查康熙三十八年八月紹興府嵊縣詳據貢監

生員李茂先等呈稱浙省錢塘江乃萬艘輻輳之會寶諸道衝
要之津怒浪狂濤不時發作早潮晚汐一日雙馳捲長隄而碎
裂排高岸以傾積沃壤良田半隨雲浪朱門白屋盡逐銀濤誠
所謂威激雷霆勢互山嶽者也按惟宋進士陳賢者嵎邑奇人
浙東間氣生具神通力拯陷溺每湖神之有祭魂輒與其馨香
凡牲醴之所歆寤卽見諸哇吐植竹誓禱立成西岸沙隄假寐
神遊躬護中流覆楫厥後清祐之歲障川迴瀾寶佑之元逆風
殺水爰是廷臣表異宋室褒封由太尉而進靈濟恆膺爵秩之
榮轉善應而加協惡頻易公侯之等夫何元明代往數百年來
久虛誥敕之頒僅享春秋之祀然而神威毅魄歷久常新每當
濟楫揚帆颶驅蓬裂惟搶呼之一聲賴神明之立應宜沿江以
爲司命而嵎民尊稱太公者也恭遇 聖治休明 皇恩廣被

及河喬嶽既懷柔乎百神崇德報勳更優渥乎萬古伏祈俯順
輿情詳請題封等情據此通詳在案臣查江神陳賢屢著靈異
舊膺封祀似非荒誕無稽隨卽齋戒三日虔設牲醴自撰祝文
備告以 聖天子德隆功盛海晏河清神果有知安瀾效順爲
朝廷保障生靈自當題請褒封以答神庥因率司道等親赴
江干祭告齋心默禱祭甫畢而潮已至風狂浪激如排山擁陣
而來觀者如堵踉蹌奔避乃潮距祭所百餘丈卽止如有阻遏
之者此康熙四十一年九月十三日事也杭城大小屬員併築
塘員役及近塘居民無不目擊嗣後每日潮汐俱不逼塘得以
及時施工是皆我 皇上愛育萬民懷柔百神之德化所致而
江神效靈有呼卽應其功似難泯沒臣彼時卽擬題請緣一時
恐出偶然未敢遽瀆 宸聰十月奉 命馳赴鎮筵會審旋蒙

恩轉補今任至本年二月趨迎 聖駕見浙來諸臣僉云塘

外頓起沙洲數里江濤離岸甚遠可保無虞是江神既鑒臣一

日之誠而不負臣則臣何敢自渝前日之約而重負江神微臣

叩見 行在時亦曾經面奏 聖明茲蒞楚南數月以來未嘗

須臾忘也屈指前事於今已一年矣臣身雖離浙言猶在耳神

明難欺臣心難昧不得不瀆陳於 君父之前再查臣前任浙

江時有前撫臣張志棟疏請將明季紹興知府湯紹恩褒封一

案奉 旨令臣詳議具奏臣遵查湯紹恩禦災捍患利賴實多

懇 恩給封隨蒙 敕賜祠額 欽定靈濟欽遵在案竊念湯

紹恩以前守建開有功尚得荷邀 天寵况陳賢以江神捍潮

顯應自當仰籲 恩褒倘蒙 皇上俯念浙省江塘關係民生

不以臣言爲荒謬伏祈 敕下部議將錢塘江神陳賢援例給

封則波臣水吏常邀萬世殊榮而報德崇功共仰千秋曠典矣

漕項錢糧請聽漕臣奏銷以歸畫一疏

該臣看得民賦錢糧例於次年四月臣等衙門題銷其隨漕銀兩例於隔年三月漕臣衙門題銷此各省歷來之通例也湖南漕項錢糧因康熙十九年以前將漕項銀米留充本省兵餉不得不於次年報銷後奉文起運亦仍沿舊例於次年五月內隨民賦造冊具詳臣衙門題銷及准部覆則俱云應俟漕項錢糧奏銷之日查核並未置議是湖南漕項先於次年臣衙門奏銷似屬重複據糧儲道詳請援照江西造報之例於隔年二月內造冊齎請漕臣題銷仍照造齎督臣暨臣衙門備案隨咨准湖北撫臣覆稱湖北漕項錢糧例於本年七月開徵至次年四月不及一年若與民賦一同奏銷則爲期不過九個月輪納未必

全完官以考成爲急民有追呼之苦所以前漕臣王櫟光題改隔年爲次年奏銷而漕臣桑□復題請照舊改次年爲隔年奏銷已經部覆奉旨欽遵通行在案今湖南漕項錢糧奏限漕臣衙門已改隔年而臣衙門仍在次年非所以遵俞旨也且各省俱聽漕臣題銷而臣衙門獨先行題銷不特與有漕各省異且與湖北不同一省兩例非所以昭畫一也臣請嗣後湖南漕項錢糧悉照湖北各省之例統俟漕臣隔年題銷臣衙門無庸次年先行造奏則事例歸於畫一庶可稍寬輸納之限而併免章奏重複之煩矣

恭報撫苗情形仰慰 聖懷摺

竊照鎮守紅苗蠢頑不率理應請兵撲勦臣等仰體 皇上好生不殺之心爲先撫後勦之計會委署辰沅靖道事衡永郴道

參議張仕可齎檄前往招撫觀其動靜已經具摺奏聞外嗣據該道稟稱抵鎮軍時沿邊軍民俱欲用兵滅此朝食隨諭以聖天子厚澤深仁將使天下無一物不得其所督撫仰體

聖心故特委官先來招撫如苗人不肯真心向化自然請兵勦滅軍民始皆開悟感頌皇恩已遣營哨兵弁苗頭把目及本地熟習苗情之人分頭入寨齎去曉諭等語又於十月初五日接該道九月二十六日稟帖內開撫諭一事仰仗皇上德威多方開導日內漸有就緒誠心歸順之苗已得二十餘寨其各寨頭目入城來見者復面加慰撫莫不歡欣踴躍業經鬚髮賞以花紅銀牌隨遣員弁同來歸苗頭分路入寨與眾苗鬚髮併清查戶口備造冊籍但犒賞之費萬不可少軍前應承招諭之人非賞賚不足以鼓其氣今遠人既來歸誠絡繹而至非賞賚

不足以慰其心此項作何動支祈立賜接濟又單開已到歸順苗寨孤塘猶巢坑萬溶江偏家寨毛穀屯塘寨到陀等七處其已願歸順尚未投到者大田羊官冲等共十三寨等因臣隨捐買紅紬布共五百八十疋於初十日遣員齎發其犒賞暫於就近州縣借支容臣設法補還併飭該員速行招撫俟各苗齊心歸順一有定局卽飛報臣與督臣便當親赴苗地宣示 皇仁相度善後方略如苗寨中仍有執迷不悟者自當題請發兵殄此餘孽臣因苗情叵測且招撫未經竣事不敢遽爲繕疏題報謹先將撫苗漸有就緒情形具摺奏 聞

恭報撫苗事竣回署疏

竊照紅苗梗化奉 旨特遣 欽差尙書席爾達等前往招撫併帶臣同去臣准部咨於康熙四十二年十二月二十五日起

程業題報在案我 皇上好生之德不啻同天 聖武之威
無遠弗照 欽差一至鎮軍宣布 皇仁蠶苗感 恩向化乞
命就撫其有三百餘寨其冥頑無知倚恃深山密箐遷延抗撫
者仰奉 廟謨調遣滿漢官兵分路進剿各將弁兵卒踴躍效
力深入搜捕掃除巢穴從來未靖之伏莽一旦銷魂從來未建
之奇勳一朝奏凱皆賴我 皇上愛育黎民以一夫不獲爲念
命將遣師招徠懾服故蠶苗授首革心邊隅永享昇平之福
除勦撫情形尙書席爾達等已經會疏馳奏外臣於康熙四十
三年正月十二日自鎮軍起程二十八日回至長沙所有微臣
回署日期理合具疏題報

小民粒食維艱懇請早借倉穀疏

看得湖南各屬積貯倉穀例於每年青黃不接之時將一半借

給窮民一半存倉備振遵行已久茲據布政使詳據桂陽等州縣詳稱去歲秋穫不登米價騰貴目今東作方興窮民乏食懇將倉穀早爲借給并懇於借給之外酌量多借該司以多借之處不便允行請照往例借給一半餘存一半加謹收貯等因前來隨經批令通飭各屬一體照例借給以紓艱食如有蠹棍冒領及該州縣虧空借端開銷者察出定行參究批飭遵照在案臣查湖南之民全賴耕種爲業上年自夏徂秋旱魃爲災業將安仁等六縣先後具疏題報已沐皇恩蠲振其餘各州縣雖未成災而秋收甚歉民鮮蓋藏以致今歲穀價高騰在在遇糴不惟貧窮者日食無措卽有銀者亦無穀可買伏念各屬捐積穀石原蒙皇上軫恤民依積貯以備荒歉今湖南倉穀照例借給一半外其一半存倉之穀亦係備振之項臣請行令藩司

轉飭該州縣確查真正饑民量爲多借務使乏食窮黎得沾恩惠仍嚴飭不許豪強富戶假捏多領俟秋收時著令一併照數還倉俾小民不致失所而農事得免廢弛湖南數百萬生靈均沐 皇恩於無既矣

特參不法守備以肅行伍疏

竊惟大小營弁必恪遵法紀而後可以約束兵卒預備干城臣於標營遊守千把等員諄諄告誡勉其殫心供職無負 皇上 綏養隆恩乃有左營中軍守備王定者賦性貪戾罔知法紀上年調委領兵前赴鎮筵縱丁私奪民船自駕往回至今舡泊河下既無舡戶亦無埠頭明係搶奪現有內丁廖起鳳朱太可審該弁又攢造官兵冊捏開外委把總朱錦張祿趙聖吳起龍陳未等名既無奉委衙門亦無所委牌票實係假捏現在鎮筵鎮

總兵雷如達兵部冊可查兵丁朱錦等可審此一弁者違禁而擾民舛藐法而捏外委姿意橫行日無功令難以姑容據臣標中軍左營遊擊林琦奉批查報前來所當據實糾參請旨革職併內丁等提問究擬以彰軍政者也再查右哨千總張理聽從王定造入未經外委之把總而右營遊擊胡連不行詳查據以轉報均難辭咎相應一併附參

特參貪劣縣令以肅官方疏

竊臣一介鄙儒叨蒙 皇上隆恩畀以湖南重任上年恭迎聖駕荷 皇上軫念遠氓特頒 諭旨盡革私徵力減加耗如仍有藐法不遵重爲民害者卽據實糾參 臣齋捧 綸音莅任之日宣布 皇仁告誡所屬嚴禁陋規盡絕私派量收耗費足資養廉一年以來諄諄訓飭不啻舌敝墨枯乃猶有長沙府安

化縣知縣魯○者姿肆貪婪罔顧法紀穢蹟昭著民怨沸騰據
司道府各揭報前來合臣訪聞無異竊念身居表率不能化貪
污爲廉潔臣之罪也職任激揚若再違功令而庇貪污臣罪
滋甚所當特疏糾參請旨革職與有名各犯一併提問究擬
以澄吏治而安民生者也

特參衛弁重耗重法疏

竊照衛弁經管錢糧既有催科之責自應潔已奉公庶使軍無
苦累臣凜遵力減加耗之上諭不特州縣有司嚴行戒飭并
令各衛弁刊立諭碑恪謹奉行乃有岳州衛守備徐○徵收
屯糧重加火耗每石屯糧額銀五錢六分該弁多收至六錢五
分七錢不等且敢擅用重法徵收以至軍旗騰怨臣訪聞既確
隨調該衛法馬飭發布政司與部頒司法相較據該司詳稱岳

州衛法馬五十兩重二兩三十兩重一兩一錢二十兩重九錢其餘每兩各重四分不等似此重耗重法廢削窮丁誠爲功令所不容請旨將徐□革職並庫吏字識一同質審究擬以懲貪弁而屯衛可甦重困矣查衛弁係都司專管之員守備徐□徵收屯糧既多加耗私用重法都司郭□並不先行揭報至臣參後十日始行詳揭又查驗該衛法馬現刻都使司較同字樣相應一併糾參

特參貪劣署令以澄吏治疏

竊惟民生之休戚視乎吏治之貪廉吏治苟不可問民生何由得安臣以一介庸材叨荷皇上高厚隆恩濫膺重任上年臣辭行在蒙皇上親灑宸翰賜以御書綏輯撫安四字臣謹臨摹勒石恭立署中朝夕瞻仰觸目警心如覩天顏如

聆 天語惟恐一日民生不安重負 皇上訓飭微 臣至意是以告誡屬員期於潔已愛民毋得營私黷貨不意猶有恣肆貪婪罔知法紀如署湘潭縣事醴陵縣知縣楊 者見事生風索詐無忌通邑怨憤輿論沸騰據司道各揭報前來毋論 聖世不容有此貪官卽 屬亦不應有此取檢 臣既愧約束之無術又何敢隱庇而稍寬所當特疏糾參伏乞 皇上將楊 革職與有名入犯一併提問究擬以澄吏治而民生得安矣查長沙府知府姜立廣並未揭報合併聲明

欽奉 上諭詳議苗邊善後疏

該 臣看得楚分南北汛多大山巨浸地極曠渺而田賦無多兼之西南一帶接壤川黔粵西千有餘里皆大小土司環居田地無出產難設流官難責貢賦且土司之官世襲給印土民猶有

約束獨鎮草紅苗種類甚繁僻處萬山深箐地實不毛不耕不賦性則頑悍慣行攘竊自古不通聲教我皇上中外一統薄海同風不忍聽其積行不法白蹈鋒刃特遣大臣統師壓境恩威並用苗卽感德傾心歸誠者三百一寨計戶口四千五百二十三戶成丁八千四百四十八丁每丁願輸雜糧二升共納糧一百六十八石九斗六升又毛都塘馬鞍山等寨先經大兵臨巢逃匿窮巖今亦悔罪輸誠披剃入冊共計一十二寨二百四十戶成丁三百六十九丁共納糧七石三斗八升俱於康熙四十四年起徵但紅苗旣已歸誠編戶納糧與民一體茲當初入版圖之時而善後事宜自當斟酌方可垂之永久臣等謹詳議九款台詞具題伏乞皇上睿鑒施行一苗邊文武事權宜專也從前紅苗土民俱係協鎮僉立哨長分管悉聽營將管

理今既移設道廳等員分地駐劄地方事應聽同知通判尚管
辰沅靖道統轄以尚責成其武職應遵定例止令約束兵丁防
汛巡查不許干豫地方事宜如有苗人自相穴鬪亦聽文員移
會酌發兵弁巡查彈壓 一苗民盜竊等案及搶奪殺傷等事
俱應照內地州縣命盜案件之例具題也查從前苗土命盜罪
律未明而蠡苗搶奪殺傷視爲泛常今紅苗旣已歸誠披剃納
糧與民無異嗣後有犯情罪重大者應照常例詳報發審具題
按律究擬仍先明白諭知使苗畏法不敢輕犯至苗有冤抑亦
許赴道廳控告卽爲伸雪則命盜杜而民怨釋矣 一紅苗捉
人勒贖之例宜嚴也苗性貪頑慣行捉人勒贖滋擾邊民今苗
與民一體應遵 王化不許仍前伏草捉人枷肘在巢勒銀贖
取如有不遵請照強盜律不分首從擬斬沿邊土哨奸民勾通

附和取利者亦照強盜窩戶律治罪庶民苗知法自畏犯也
一土官之責成宜專也鎮筵既設同知通判專管苗務其五寨
司土官土民應聽該廳統轄遇有逃盜等事將土官一併處分
俾土官無岐視抗延之虞矣 一添設廳員之關防宜給也查
府城同知通判無請給關防之例因其無錢糧盜案之端責今
紅苗歸誠其該廳分駐乾州鳳凰營要地非同城可比且經徵
錢糧升合俱關考成盜竊人命搶奪殺傷之事承審招詳皆有
定限應請頒給關防以速郵遞而昭信守至奉文於楚省現任
巡檢各撥一員交與同知通判令其巡緝查各州縣巡檢均有
巡捕之責難以缺員止有奉裁未經離任巡檢可以撥往今議
以長沙縣喬口鎮巡檢李光祖調赴乾州同知員下善化縣暮
雲市巡檢宋純儒調赴鳳凰營通判員下并請鑄給乾州鳳凰

營各巡檢印信俟準鑄新印到日將舊印繳銷俾得各專責成一
一新設移駐各員應照邊俸以示鼓勵也查楚省民苗雜處
之州縣官員經前任總督郭琇條奏部覆准其調補并照四川
貴州邊俸之例陞遷在案今鎮筸一隅環徧苗巢移駐之道員
添設之同知通判巡檢皆駐劄苗地又與川黔接壤自應照邊
俸陞遷遺缺一例調補 一新設移駐各官之廨舍宜置也辰
沅道移駐算城所需廨舍應將五寨司土官衙門騰出以作道
員衙署并動支各官捐建銀兩量加添修給該道駐劄其同知
通判巡檢各廨舍將從前各官公捐銀兩酌量分給建造以定
規模 一土司之士子宜訓苗民子弟宜設義學教育也查五
寨司洞民哨民俱應統歸文職管理至於五寨司生員雖舊屬
辰州府儒學兼轄但五寨司距府三百餘里生員遇有過犯司

鐸之官遠難飭懲今議以附近之麻陽縣儒學訓導移駐五寨司就近訓迪士子并請鑄給麻陽縣訓導學記以便生童應考一切冊結可以鈐蓋照例齎報庶事件不致遲延而子矜得司鐸約束亦可免挑達之風再苗民子弟不使學習詩書終必野性難馴義禮不明應於乾州五寨司等處設立義學數區苗人子弟有志就學者聽赴肄業每年師儒館穀議於通省文武公捐俟學習既久教化有成準附五寨司學應試將見愚頑之習化爲禮義之民矣 一接壤之邊釁宜息也楚黔接壤之區苗寨相連向有冤家仇敵動輒殺搶彼此拏人構釁不止今既各省設立廳員嗣後黔楚相接之苗再有越境操戈彼此拏人構釁者兩廳移明會審發落卽以白晝搶奪律治罪被拏之人勒令退還如殺傷人命依人命論百戶寨長知情不行禁止以通

同治罪

恭謝 天恩疏

欽惟我 皇上治奏平成德隆覆載 親視河工 臨幸江浙

深仁厚澤臣庶均沾尤加意人才 特諭士子俱赴 行在

御試 欽定高下槩令引 見以弘獎勵多士聞風踴躍僉謂

書生榮遇千古難逢茲 臣接閱家信 臣孫生員 臣趙侗敬蒙

恩 召試 召見念係微 臣之孫詳垂詢問 天語春溫 天

顏日霽 臣聞信之下感極涕零伏念我 皇上以河工關係重

大今當淮黃底績 躬親相度指授善後永圖復軫念江浙民

生問俗省方行慶施惠 臣鄉父老子弟盡在恩波浩蕩之中 臣

遠任巖疆不獲趨趨扈從恭請 聖安犬馬微忱方深眷戀乃

臣孫侗敬一介童蒙茫無知識上荷 聖主優容憐其幼稚勉

其向進使極愚極賤之小子幸免隕越於 至尊之前高厚

洪慈更出望外 臣 兄弟父子祖孫世受 國恩涓埃無補清夜

自思實感且懼惟有訓戒子孫一日不忘 君父一日不負

朝廷永矢報稱於萬一耳除望 闕叩頭謝 恩外理合繕疏

恭謝

請補戰馬以資馳勦以符營制疏

該 臣 看得 臣 標援例請添戰馬一案經 臣 具題部覆以前任偏

撫楊鳳起既已題裁今所請添增之處無容議等因 臣 隨轉飭

遵照在案茲據標下左營中軍遊擊林琦右營遊擊胡連詳稱

前奉部議止查前撫題裁之原案未經察核馬一步九之舊制

今本標兩營現在兵一千一百九十一名內止有馬兵八十名

按數計算尙少馬三十九匹詳請援照全楚各營通例題請補

添以符經制馬一步九之數等因前來臣查楚南雖屬內地而臣標實爲援勦之營仰懇 皇上俯念營兵必需戰馬準照全楚各營通例於臣標兩營共添補戰馬三十九匹庶軍威克壯而援勦有資矣其應增馬匹容各將弁自行捐買補足合併聲明

恭謝 天恩疏

竊惟三年大計事關黜陟鉅典倘所舉非人則上負 聖主激揚至意何以振興吏治鼓勵循良臣於上年同督臣察核湖南屬員如衡永郴道張仕可龍陽縣調邵陽縣知縣鍾靈秀藍山縣知縣楊宗仁三員雖於例各有未協但其居官實蹟允爲臣屬中翹楚臣等再四思維與其拘牽成格自蹈蔽賢之罪寧爲據實上請甘受違例之愆是以開列卓異冒瀆 宸聰部議以

張仕可鍾靈秀楊宗仁各任內有歷俸未滿及未完案件與例不符不準卓異將薦舉之督撫司道府等官罰俸此固臣等應得之處分無所辭咎乃蒙我皇上愛惜人才聖衷獨斷將張仕可等俱準爲卓異已邀破格殊恩且矜臣等愚昧無知俱寬免罰俸宥過深仁更施法外是不獨仕可等受恩最深報稱誠難而臣等並沐聖慈感愧何極惟有益加勉勵以酬高厚於萬一耳

恭謝 天恩疏

康熙四十四年六月二十七日臣接閱邸抄內開吏部一本爲補授翰林事奉旨趙申季張逸少俱著授翰林院編修依議欽此臣聞命之下隨恭設香案望闕叩頭謝恩訖伏念臣以庸才陋質仰荷主知畀以封疆重任碌碌素餐方深

愧懼而臣弟申季一介書生初任遷江知縣循分守職未及三年卽蒙 特恩 召見 召試竊慮學業粗疏難免隕越不謂 聖德優容俯垂獎勵授以編修之職俾得讀書中祕稍效犬馬微勞風塵末吏一旦膺此殊榮實屬從來所未有臣同懷兄弟二人本由寒士進身初無寸長表見並蒙 皇上格外之典非常之數受 恩益重圖報愈難清夜自思踟躕無措惟有勉竭駑駘戒勗子弟以不負此心者不負 皇上夙夜匪懈冀酬 高厚之恩於萬一已耳

請均楚省鄉試南北額數疏

該臣看得湖廣幅幘遼闊苗裔雜處於康熙六年題請分轄南北惟有三年大比湖南士子仍歸湖北考試第近科以來自康熙二十三年甲子科至四十一年壬午科湖廣鄉試中額不等

湖南總不及四分之一或僅逾十分之三且已卯壬午兩科俱蒙皇恩加額而湖南取中之數反減於前今四十四年乙酉科又遇恩詔廣額之年士子感激自奮志切觀光臣復遍訪地方官敦促赴試學臣亦廣加收錄今年應試生儒較往歲更多及至榜發湖南中式者仍不及四分之一查湖南各屬半處山陬加以洞庭險隔應試之跋涉倍難而入彀之英才甚少以致賓興盛典獨歎向隅此生員王元復等所以連名環籲有分卷之請也茲據布政使具詳前來臣伏念我皇上振興文教八表同風愛惜人才一長必采凡懷鉛挾策之士無不踴躍功名以期登進卽就湖南而論如史冊所載名儒鉅卿事業文章卓然可紀指不勝屈而家絃戶誦多士蔚興則未有如今日之盛者臣仰體聖主立賢無方之意目擊士子感恩向進之

忱不敢墮於上聞是以據情入告但分闈事屬創始固難輕議至於分卷之說按查科場條例如順天鄉試有且字等號陝西省鄉試有丁字韋字等號皆爲邊遠地方而設今湖廣省之湖南亦屬邊遠似可援例而行庶使人知進取有額並將鼓舞爭趨茲據諸生呈請并該司議詳俱稱兩湖州縣畧同人才亦復相埒中額自應均分然聖明在上洞照萬里事無鉅細一經睿裁普天悅服非臣等愚昧所敢妄爲置議也

特參署令縱蠹私派殃民以遵功令疏

竊臣至愚極陋荷皇上不次殊榮畀以封疆重寄康熙四十二年二月內臣趨叩行在蒙皇上軫念湖南地方介在邊遠向來官吏積習相仍特沛綸音諭臣嚴飭大小屬員力減加耗盡革私徵以甦民困煌煌天語下逮湖湘窮簷僻壤無

不焚香頂祝重慶更生臣欽齋 聖訓勒碑傳檄殫心奉行更
於接見屬員諄諄誥誠務期力除陋弊休養黎元以不負 皇
上委任撫綏至意又恐地方遼闊或有陽奉陰違刊發告示遍
諭周知將現年里長單頭歇家名目嚴加禁革庶幾蠹弊不生
閭閻無擾共鼓歌於堯天舜日之下乃有靖州以知縣管理州
事李○委署綏甯縣事抗違 功令縱蠹殃民仍立現年覈法
蠲派於本年二月內聽蠹庫吏龍巖輝等指稱幫庫通縣每畝
派銀三厘五毫九絲五月內又指稱冊費通縣每畝派銀一釐
四毫四絲零各婪贓入己民怨沸騰臣訪聞既確隨據司道揭
報前來所當特疏糾參請 旨革職并有名蠹役一併嚴提究
擬以彰國法而除民害者也

衛糧徵米重累懇照全書則例徵銀疏

三
臣等查得清浪平溪二衛屯糧米石請改徵銀一案先經前撫

臣楊鳳起會題部覆以照依現在全書則例徵糧已久應將所請之處毋容議等因欽遵在案茲據清浪衛守備席嘉興平溪衛守備吳丕烈復各據呈詳請前來臣查清浪平溪二衛屯田先年原無徵米之例祇緣順治十六年設站應差暫徵本色以供夫馬糧料此不過一時之權宜原非全書之定額及後糧料已於驛庫支領而屯糧猶沿征米屯民僻處山隅挑運赴城交倉勞費加倍況查二衛屯糧歷年奏銷報部俱復奉文變價起解第與其變價於徵米之後不若改徵條銀以符刊定之全書伏念我皇上德隆覆載明並照臨遠方疾苦尤屢宸衷臣以菲才濫膺撫綏重寄深悉屯民納米之苦累曷敢壅於上聞再查四十五年米石已蒙上諭蠲免但屯民恐將來沿舊

徵米同聲環顧相應據詳題請洪恩出自 聖裁倘蒙 俞允

炤依 本朝欽定全書則例仍復改徵條銀則邊衛窮黎永戴

聖主浩蕩之深仁無既矣

謹援遞解之例懇免長解之累疏

竊照湖南定例除逃人遞解外其免死減等押發黑龍江犯人
凡在犯一名地方官僉點有家產正身差役二名長解遵行已
久但湖南僻處邊徼地方遼闊距京師各四千餘里不等解役
往返卽有萬餘里其開行李之費食用之需窮役不能支應勢
必至於幫貼貼費計無從出勢必至於派累而且州縣設立差
役止有此數僉解既多保無缺誤 臣 輾轉思維誠有不得不亟
圖變通者適接邸鈔刑部議覆兩廣總督郭世隆條奏長解之
程途遙遠等事一疏嗣凡粵省起解免死減等盜犯無論名數

多寡俱照逃人之例遞解等因奉 旨依議欽遵在案湖南與兩廣接壤臣請嗣後起解免死減等盜犯一體照逃人之例遞解且起解人犯沿途原有護解差役十名卽令逐程遞解自可無慮疏虞是解役旣不苦於長途而地方亦可免於派貼荒陬黎庶永戴 仁恩無極矣

謹瀝微忱仰祈 聖鑒疏

竊臣九載外吏七年田里蒙 恩拔擢謬任封疆常慮才識謏劣涓埃無補感激 高厚勉圖報稱惟知上有 君父下有地方一切交遊故舊盡廢往來卽家人父子亦不能兼顧如臣子鳳詔遠任太原府知府道路旣遙音信甚少波中諸事臣俱不及聞知近閱邸鈔見臺臣蔡珍爲 聖主之洞鑒最眞學臣之代題可駭謹據實糾參以肅官方事一疏內稱山西學臣鄒士

璉特有代題保留撫臣一疏查袁○疏內有太原府知府趙鳳
詔係巡撫私人等語士璉既屬鳳詔同科進士其父申喬又係
士璉本省巡撫彼此世好綢繆固結今太原士民劉純德保留
焉知非鳳詔之賄屬鄒士璉冒昧代題又焉知非鳳詔之請託
等語夫長沙距太原數千里臣子鳳詔之有無賄屬曾否請託
臣何敢妄爲置辯惟是臺臣所稱彼此世好綢繆固結臣果有
此心卽是結黨欺臣君之罪狀臣受臣恩深重報效無由而敢
結黨是欺臣聖明則臣卽倖逃於國法斷難追於天誅但臣子
鳳詔前年揭送李○書函一案久爲眾口所交責蓋李○與臣
同中康熙八年南北榜舉人而○子李○與臣子鳳詔又同中
康熙二十六年南北榜舉人臣子鳳詔旣得罪於同科舉人之
父則學臣鄒士璉亦未必修好於同科進士之父且臣子鳳詔

既得罪於父之同科舉人臣又何至再修好於子之同科進士而臺臣蔡珍遽指爲世好固結果有所風聞耶抑出於揣摩之見乎至臺臣又謂臣係鄒士璉本省巡撫彼此綢繆臣年力已衰來日苦短宦情既淡交情甚疏況臣駐劄湖南長沙鄒士璉籍係湖北麻城相去幾二千里臣子與鄒士璉雖屬同科進士臣與鄒士璉實未謀面若以本省巡撫卽有綢繆則楚省之士於內外者頗不乏人如其一言一事卽歸罪本省之巡撫則巡撫豈能盡約束本省之仕宦而臺臣蔡珍遽指爲彼此綢繆果有所風聞耶抑出於揣摩之見乎臺臣職司言路凡有風聞固宜入告而揣摩之語似不應上瀆臣宸聰總之臣本庸材濫膺逾格一家俱邀非常之恩福過每虞意外之咎除臣于鳳詔聽候察實處分外伏乞 皇上俯鑒微忱將臣亟賜罷斥俾孤

子不爲仕路所不容而林泉永戴 聖慈於罔極矣

運軍二耗請照舊給發疏

該臣看得漕運惟湖南爲最遠而運丁又惟湖南爲最苦而最疲查出運支給錢糧每運軍一船給二耗米九十一石一斗零給行月二糧共米一百二十六石每石折銀四錢共折給銀五十兩四錢今准部覆科臣戴番條奏將康熙四十三四兩年江浙兩省各幫掛欠米石數目查明到日行令總漕檄行各該糧道於前項漕贈漕截等項銀米內照數扣抵嗣後將前項銀米暫存糧道倉庫內俟回空時倉場查明行文到日按其掛欠數目扣抵倘猶不足將行糧一併扣抵如交納無欠照數支給等因移咨轉飭驛糧道遵照嗣據該道詳稱湖南運丁應支錢糧止有二耗行月銀米萬難與江浙省有漕截漕贈者一例扣存

等因咨明戶部准部覆給軍耗贈一項奉旨扣抵掛欠在案
臣查湖南運道既遠於江浙而漕截漕贈又惟江浙爲獨有科
臣條奏似止從江浙起見卽部臣議覆亦原止以康熙四十三
四兩年江浙兩省掛欠米石於二耗漕截等項內扣抵今若併
及於湖南而且以湖南無欠之丁扣留防欠則湖南並無漕截
漕贈惟藉此二耗行月糧米以資飛輓既扣此二耗則僅以五
十兩四錢之行月而欲運每船六百三十七石九斗之正米四
耗歷江湖涉淮黃越數千里以達於京師窮丁卽有急公之心
重運終鮮神輸之術束手坐視必致悞漕迫令開幫豈能枵腹
萬一此十一萬六千餘石之漕或致遲阻卽將該丁立置重法
已無及於抵通之限矣臣思皇上厚澤深仁普天霑被必無
一夫不獲而後慰聖主天地覆載之懷今軍有不支之勢漕

有難運之形臣身任地方日擊情事不敢諉之於相隔數千里之漕臣是以不辭冒昧徑檄該道查明康熙四十三四兩年果無掛欠須抵免其扣留防欠卽將二耗照舊給發各船旗丁責其尅日開幫北上仍取具實在領狀并不致掛欠甘結在案如有掛欠臣卽親追領過二耗賠補倘追補不前臣願照定例甘受處分至臣理應候 旨給發實以漕船待此開幫候 旨必致遲悞非敢擅專伏乞 聖明慈宥又漕臣遠在淮上不及會稿併事關漕務緊急不能待開印日期合併聲明

請將倉穀減糶以資民食疏

臣該 看得湖南素稱產米之鄉歷來米價較他省爲賤祇緣上年入夏雨澤愆期秋收歉薄而康熙四十五年地丁錢糧欽沐皇恩蠲免有田蓄穀之家旣無輸將之費必不輕於出售且

外省商販絡繹以致目前米價倍於往昔小民粒食維艱茲據布政使詳據長衡二府詳請減糶倉穀緣由查湖南上年雖非災歲近因米價偶貴之處小民難於資生請將長衡兩府屬倉貯穀石於春閒借給窮民之外每屬量留一二千石其餘盡令減價糶賣秋收照數買補還倉此外各屬再有米穀缺少者一例減價發糶均於秋成買補還倉一通融開市價自平而民皆得食咸沐天恩於再生矣

臣目擊情形難以緩待已仰體 皇仁一面

檄行布政司轉飭減糶并嚴飭不許胥役需索短指及奸商地棍多買轉販務使窮黎得沾實惠合行題明伏乞 聖慈鑒有
仰臣再有請者各屬倉穀原按州縣大小積貯今閒有被災動
振及屬員那空缺少者多不足數一遇荒歉無以備振且青黃
不接之時不能一例出借臣請以現今賣出穀價飭令該司查
明穀少州縣按數另詳均勻撥發秋成時買穀實貯庶不足州
縣均有豫備已飭該司將減糶同酌撥地方穀石數目造齋統
俟到日另行咨部合併聲明

南秋開徵有期兵糧支給難緩疏

臣看得湖南各制營應需月米歷年在於本年南秋米內支
給但南秋二米例係七月初一日開徵而兵丁月米例應按月
開支是春夏二季兵米必須豫爲徵收方能計月支給茲據驛

鹽糧儲道詳稱湖南各制營兵丁每年奉部撥給必先撥上年存贖等銀再撥本年地丁等項湊支一年俾各營兵丁月餉均得季首闕支而州縣地丁亦徐徐按限徵解是酌撥兵餉之中已寓寬紓民力之意則兵丁春夏二季月米亦可一例邀撥上年解存充餉米石且湖南長衡岳寶靖五府州屬每年應徵南秋二米約共一十三萬有零湖南二十三標鎮協營兵丁除閏月外每年亡應需月米約共七萬有奇是解貯本年充餉南秋二米約共六萬有零可供各營來歲春夏二季兵食尙且存贖似應以此貯庫充餉之項每年於春夏二季按數給兵俟七月開徵以後卽於新徵內支給秋冬二季嗣後每年征收南秋除現給本年秋冬二季又留充下年春夏二季兵米外餘存仍照例折徵解部充餉兵丁免先期之守候民間緩半年之豫徵湖

南百萬生靈永戴 皇仁於億萬年等因詳請題達前來 查
南秋米石例應七月初一開徵而制營兵丁春夏二季月米又
應按月關支則不得不豫徵以應各兵之支給但當青黃不接
民間既有地丁完半之催徵又值兵米必需之輸納小民未免
豫徵之苦查湖南每年應徵南秋二米除支給兵糧外尙存六
萬石有零解貯充餉而春夏二季兵米不過三萬七千餘石仰
懇 皇上洪恩俯 益南秋原有七月開徵之定例而兵糧又有
按月支給之定限卽將貯庫充餉米石照兵丁月餉一例豫撥
按數給發春夏二季兵糧其秋冬二季就於七月新徵內支給
嗣後每年除現給本年秋冬二季及留充下年春夏二季兵米
外餘存仍照例折徵解部充餉則兵丁得以計日餬口而小民
亦可遵限輸糧頂戴 聖慈共祝 萬壽於無疆矣

湖南僻壤銓選維艱懇請南北分選疏

該臣看得敎職官員例於本省銓選茲據布政使詳據湖南各屬選拔副榜恩歲貢生傅霖等呈稱湖廣地方中隔洞庭相距千里不等每逢秋闈湖南應試者少故中式者亦少雖貢生南北一例而人多缺少銓選需時迨至垂暮之年幸邀選授倘在湖北或力難赴任或阻滯違限懇請南北分選等因具詳前來臣查全楚地方延袤數千里中隔洞庭大湖其湖南候選貢生選授湖北者途路既遙風波復險或苦於盤費而力難赴任或渡湖阻滯而憑限多違臣每當考試給憑之際見窮老儒生進退兩難殊爲可憫合無仰懇 聖慈將現在候選之選拔副榜恩歲貢生嗣後籍係湖北者則選湖北之缺籍係湖南者則選湖南之缺庶南北赴任之員均免險阻之虞而寒士感沐 皇

恩直與天地同其高厚矣

特參私派劣員以肅官箴疏

該_臣看得湖南地方從前一切私派_臣已仰遵 諭旨盡行革除而清查荒蕪田地有關 國計民生_臣竊慮屬員奉行不善以致累民是以通飭各屬凡查出自首新墾田地止造簡明冊籍以省繁冗并飭不得混行駁查誠恐有不肖官員籍稱冊費苛派擾民諄諄告誡嚴行禁革在案乃有辰州府屬之辰谿縣知縣徐_□者罔顧 功令輒藉造冊名色照糧派費據布政使董昭祚等詳稱訊據經承謝玉車等僉供辰谿縣原荒糧四百八十石除沉衛失額無主一百二十石土民余世重等每石荒田派銀一兩五錢與本官作冊費等語似此藉名苛派溺職病民所當據詳糾參請 旨革職與有名人犯一併嚴提究擬以

爲濫派虐民者戒

請分教職移駐嶽麓書院以專責成疏

該_臣看得長沙府嶽麓書院乃宋儒張栻朱熹講學之所爲四大書院之一左建先師孔子聖殿儼如齋序康熙二十六年蒙

皇上特賜學達性天匾額并頒給解義經史諸書宸翰輝

煌奎章炳耀凡屬臣民覲光恐後茲據布政使詳稱書院在郡城西岸遠隔江濤誠恐崇奉無人致貽隕越查地屬善化議將

該學訓導移駐看管等因具詳前來_臣思書院既有先師聖殿

又重以御筆之光懸賜書之寶貯萬世咸仰君師崇奉

宜有專責請以善化縣學訓導移駐嶽麓書院併酌給閒房捐資添蓋令其居住庶瞻天仰聖永依雲漢之爲章而入室升堂長護門墻之數仞矣

請添驛站以均勞逸疏

該臣看得設立驛站原以供應皇華必期道里適中勞逸咸均始堪無悞茲據驛鹽糧道詳稱湖南所屬驛站計程安設近則五六十里遠則八九十里最遠者亦不過百里惟長屬之南岸驛衡屬之黃壑驛相距有一百八十里之遠一遇差使往來動經數日夫馬奔馳之勞瘁實有倍於他驛者查南岸黃壑二驛之中原有黃茅鋪一站奉裁已久若據請增設動支錢糧似難允行擬於南岸黃壑衡陽排山祁陽零陵六縣驛各抽馬七匹馬夫三名半損夫十名共計抽馬四十二匹馬夫二十一名損夫六十名添設黃茅一驛其南岸黃壑等六驛站除抽調外各存馬四十三匹馬夫二十一一名半損夫六十名又各驛獸醫止有一名無可抽調黃茅驛亦請添設獸醫一名其每年工食卽

於六驛歇醫工食內均攤其各項工食工料藥餌廩糧馬價銀兩俱於各該驛額設錢糧內照數撥給此抽調添設之黃茅驛將南岸驛丞改駐管理而南岸驛務歸縣兼管如此調補轉移庶無動費錢糧之慮又岳屬臨湘縣之長安驛與湖北蒲圻縣之港口驛接界港口驛舊例未設撥夫係蒲圻縣之排夫合併走遞致湖南長安驛夫差亦越港口直送蒲圻方行接替是湖南一驛之損夫送湖北二站之差使事屬偏累屢經咨移未能改定等因具詳前來臣查長衡二府相距之中向有黃茅驛站接遞南岸黃壘差使後經奉裁以致南岸黃壘一驛之夫馬兼兩驛之奔馳今據該道詳議於南岸衡陽排山黃壘祁陽零陵六縣驛調抽夫馬添設黃茅一驛其各項銀兩俱於各該縣驛錢糧內照撥將南岸驛丞移駐管理似可垂永久而均勞逸又

臨湘縣之長安驛損夫差使越湖北之港口驛直送蒲圻縣接
替偏受苦累既據該道一併呈詳相應具題仰祈 敕部府准
抽調添設黃茅一驛併行湖北議設港口驛損夫接替庶南岸
黃壘二驛之夫馬不致疲斃而長安驛之損夫亦免其越送苦
累矣

趙恭毅公贍藁卷第一

走ヲ考ルニ月ヨリイ

馬

趙恭毅公贖藁卷第二

孫男侗敦謹編

奏疏

謹呈原疏恭候

聖裁疏

以下偏燕任

竊臣於康熙四十六年十二月二十二日拜疏爲要地急需賢能等事因知縣銜管桂陽知州事伍士琪經臣薦舉卓異蒙授恩俞允嗣奉 旨補授山西朔州知州旋據布按二司詳據桂陽士民僉呈請將伍牧留任臣思桂陽州僻處邊壤地雜苗猺且山連大湊姦宄易生伍士琪雖莅任未久而士民愛戴情懇若聽其去任則該州係調補之缺本省一時無可調之員必當請歸部選無論苗缺未便久懸而生手不能熟習臣從地方需才起見是以會同督臣郭世隆題請將伍士琪照知州陞銜仍留桂陽州原任拜疏之後士民方慶循良久任而臣亦幸地方

得人今通政司發還原本稱伍士琪已經奉旨補授朔州知州此本不便封進竊該員之陞任誠沐皇上特擢之恩而臣等之請留亦體皇上愛民之意如雲南布政使劉蔭樞由該省按察使已陞廣東布政後蒙皇上允督撫臣之請即改本省布政現有成例可循今題留一陞任知州又經揭送部院科道而入告之疏不得一蒙御覽臣之寤寐實有不安不辭冒昧照依原疏再繕徑呈又念通政司既將前疏發還必不將今疏代進謹以密疏上聞應否準留伏候聖裁臣蒙恩高厚待罪封疆如事不應奏甘受君父之處分而志在無欺總恃聖明之照察爲此謹將原疏一併密題臣不勝戰慄待命之至

題明考選軍政疏

該臣看得軍政大典撫標遊守千把撫臣止循例據中軍官詳
賁履歷咨會督提查核並無揭報之例竊巡撫衙門欽奉 敕
書聽總督節制尙無揭報督臣衙門之例況臣並未奉有聽提
督節制之 敕書何得反有揭報提督衙門之例今提督俞益
謨乃稱準臣偏沅巡撫趙申喬等各揭報不知是何緣由若以
臣標中軍曾經揭報提督衙門則中軍官之揭報不可卽爲巡
撫之揭報若以臣繕疏具題後曾經照例移揭則移揭並非揭
報且臣移揭在十月初四日提督具題在九月二十七日何從
預知而卽指臣爲揭報臣若應揭報而不揭報則提督疏內卽
應糾參臣既並未揭報而混稱揭報則提督所題殊爲失實臣
非與提督爭此紙上之數字也念 朝廷設官各有體統臣子
分職不容踰越況今日之章奏卽爲異日之考據臣今隱忍不

言則提督衙門援以爲例將來必責巡撫衙門之揭報臣巡撫衙門不欽遵 敕書而乃與總兵官同揭報提督衙門同受提

督之節制臣固庸碌不應與提督較量恐後來之撫臣與直省

之撫臣皆議臣爲悖逆 天朝定制臣更何以自解也且提督

俞益謨原疏現在部科若經部科查出謂臣何故違例揭報甘

聽提督節制臣至彼時聲辯益覺自慙是以不避怨尤不辭冒

瀆仰祈 皇上敕下部科行令提督俞益謨查明臣曾否具有

揭報應否亦當揭報著爲定例庶臣衙門得以遵守而微臣亦

不致爲紊亂 大典之罪臣矣

苗地之員相同邊腹之俸各異籲請一視同仁疏

該臣看得辰州府永順保靖二土司經歷員缺均屬苗地據該

經歷朱衣王昌錫請照苗民雜處州縣一例陞遷由司呈詳前

來臣查楚粵黔蜀等事案內苗民雜處地方府州縣官奉準部覆均照四川貴州等省邊俸之例陞轉遵行已久今永順保靖二土司經歷所管地方實係苗疆與有苗州縣無異而其俸獨與腹俸等例不畫一似當與有苗州縣一體照邊俸陞轉相應請旨倘蒙聖恩俞允則寒苦下吏不致終老窮邊而於定例得昭畫一矣

代弟泣謝 天恩疏

竊臣胞弟趙申季由丁丑科進士選授廣西遷江縣知縣康熙四十三年冬蒙皇上高厚隆恩破格召試特授翰林院編修乙酉科欽點順天武鄉試副主考又蒙欽點提督山東通省學政丙戌科會試同考官叨沐殊榮實屬非分臣每貽書勸勉務期殫心竭力仰報主知臣弟申季感激生成

自矢清白供職答

臣

書內有一點丹心九死不移之語故考試

山左恪遵

功令不敢毫有苟且諒久在

聖明洞鑒中本年

又蒙

恩特陞

日講官起居注不意

臣

弟福過災生今夏積

勞成疾且迫於科試力疾校卷八月初旬試事甫畢而神衰骨瘦元氣耗脫至十六日遂成不起

臣

聞信卽遣人往彼迎喪知

弟申季臨終惟以受

恩深重未報涓埃爲憾格於定例不

得具本陳謝囑

臣

代奏犬馬之報願效來生痛

臣

兄弟止有二

人臣尚苟延食息

臣弟早辭

聖世念其長逝之時不忘戀

主臣不負亡弟之言是以冒昧奏聞

特參重耗劣員以遵 功令疏

竊臣

一介庸材荷蒙

皇上高厚隆恩畀以撫綏重任欽承

上諭令臣

力減加耗盡革私徵故履任五年夙夜悚惕無日不

以 皇上訓誡爲心卽無日不以民生疾苦爲念勸諭屬員務期潔已愛民除養廉之外不得恣行培克以負 皇上設官爲民之意更飭該管上司嚴加稽察不得徇隱曲庇通同朘削乃有武陵縣知縣馬口者罔畏法紀私令家人黃義置造大等稱收每庫法銀一兩止稱八錢五分里民吞聲抱怨臣自鎮草會審回至常德委員查閱該縣銀櫃掣出納戶梅志卿王伯顯原銀二兩稱驗俱照庫法每兩加一錢七分零每錢加一分七釐零訊據櫃書庾國卿等僉供每兩作八錢五分稱收現有大等可証納戶梅志卿王伯顯原銀可審查本官徵收過康熙四十六年四十七年民屯錢糧共一萬八千七百餘兩似此違 旨重耗殊難姑容相應請 旨革職併有名家人蠹書嚴提究審以肅吏治而安民生者也至司道府隱匿不報定例甚嚴查該

縣重耗係丁憂布政司董昭祚任內之事並未查報又常德府知府王口原經革職蒙恩留任自應正己率屬仰報高深乃徇庇貪員不行揭報辜恩負罪更有難寬併請敕部照例議處以爲隱匿不報之戒

特參虧空貪婪州牧以肅法紀疏

該臣看得州牧爲親民之官必須倉庫無虧廉隅克謹方爲無忝厥職乃有茶陵州知州李口者罔顧功令因虧空錢糧三百兩倉穀九百六十石無償遂製匾一百餘面遍送矜監富戶每戶勒派謝儀銀五六兩不等虧空貪婪溺職病民據司府詳揭前來所當請旨革職嚴提究擬以肅法紀者也

再請將存貯南秋預撥兵米疏

該臣看得兵丁月糧先據驛糧道按照部撥兵餉之例請將上

年解存充餉南秋米石預撥次年春夏二季月糧其本年南秋
二米照例七月開徵呈詳到臣經臣會題部覆以湖南歷年兵
米俱於本年南秋二米內支給遵行已久不便更張等因當檄
該道欽遵去後茲復據驛鹽糧儲道參議成光詳稱兵丁糧米
乃按月授食之需春夏二季正青黃不接之際以秋收之糧米
早供半歲之預支禾稻既未登場窮黎有懷莫告若以解存之
項撥充春夏之糧兵丁既免於守候百姓亦緩於輸將而於額
欸仍無移易前因未屆奏銷庫項尙未盤查恐涉掩覆虧空之
嫌不敢遽行瀆詳茲奏銷及期存庫錢糧俱已盤察清楚業經
藩司出結在案便民之事所當再請具詳前來臣查春夏兵丁
月米請將上年解存米石預撥支給既經部覆不便更張何敢
復瀆惟是臣一介庸材叨沐 聖恩備員南楚又奉有綏輯撫

安之 御書則事事必求其緩輯人人必得其撫安斯足以仰
副 聖主愛育黎元之至意伏思春夏二季正民間青黃不接
之時徵收南秋二米以給軍糈在兵有急不容緩之勢在民有
迫不能應之情民不能應則兵不免於守候兵不容緩則民不
免於追呼今以上年解存充餉南秋米石預撥次年春夏兵米
其秋冬二季就於七月新徵內支給嗣後每年徵收南秋除現
給本年秋季二季及留充下年春夏二季兵米外餘存仍照例
折徵充餉是一先後轉移而兵糈不致有缺民力得以稍紓額
款亦不移易且以存貯候解之項撥爲支給實用之需則道庫
無慮其侵挪似於 國計民生均有裨益相應再行題請仰懇
皇上俯賜俞允則湖南百萬生靈永戴 天恩於罔極矣

特參貪劣通判以肅法紀疏

該臣看得湖南地方界在邊遠荷蒙 皇上軫念民生澄清吏治臣 謬任封疆凜遵力減加耗盡革私徵之 諭旨嚴飭司道府官誠勉屬員務期潔已愛民以仰副 皇上委任撫綏至意不意有永州府通判周 委署零陵縣事因離省寫遠遂恣意貪婪徵收地丁各項錢糧共四萬餘兩每納銀一兩止給印串八錢四分櫃書可審又自理民間詞訟不顧曲直任性枉斷顛倒是非民怨沸騰似此劣員誠難姑容以貽民害所當據實糾參請 旨革職併有名蠢役嚴提究擬以肅官箴者也

特參生員受賄保留疏

該臣看得丁憂原有定例保留事干大典原任湖南布政使董昭祚既經丁憂而劣貢吳沔劣衿潘世德受賄保留倡率兵民十七人呈請奪情據供俱係董藩司門客陳風水許銀五六兩

不等一路都是陳風水同承差袁光明供給又吳沔供陳風水說銀子是布政司發出來的袁光明供這銀子據陳風水說是司主發出來的吳沔等既聽囑遞呈又供許銀並未交給查吳沔係辰州府歲貢相應請旨將吳沔革去貢生以便與有名人等一同究擬定案至原任布政使董昭祚先經革職蒙特恩留任自應洗心滌慮砥礪操持以期無過以報天恩乃丁憂之後撥令門客賄買劣棍邀集無賴并令承差僱船供給赴臣五寨司行署朦朧呈請留任奪情臣若墮其術中則扶同欺飾萬死奚辭董昭祚身爲大吏貪位戀職行賄保留則其欺君忘親不忠不孝誠爲大玷官常所當一併題參伏乞皇上敕部議處以儆官邪而昭法紀臣謹會題

苗疆距省甚遠案件懇請展限疏

該臣看得 欽部案件例有定限稍爲遲逾卽予處分據按察使郎廷棟詳稱湖南有苗州縣暨鎮筵所屬新撫紅苗地方俱接壤兩粵滇黔與土司連界其土司所屬俱係熟苗事件已難完結而有苗州縣地方多有生苗凡承查拘審事件必須有司籌畫而行非可艸率實難與腹裡州縣扣限報結請題展限前來臣查定例內開廣東巡撫所管瓊州雖係本省地方相隔寫遠應照隔省例限六個月具題等語而楚省南北土司事件限期亦經前督臣郭琇題明準部咨者俱照隔省六個月報結部議允行在案今湖南有苗州縣俱距省寫遠文移往返動經數月其奉行事件仍與腹裏州縣一體扣算途遙限迫以致屬員不能依限完結屢受參罰臣請嗣後有苗州縣如奉準部咨案件俱照土司事件之例作六個月限報結其命盜等案再請於

昭畫一矣

請停場後補科疏

竊思定例學臣考試生童三年內一歲一科生員歲試有優劣之分科試有賓興之望童生隨歲科兩試爲進身之階故皆爭自濯磨不肯甘於暴棄所以勤課業育人材法至善也乃或學臣試事未周而場期已迫因有以歲作科之請而部臣亦遂定場後補科之例此雖相沿已久而臣於此不能無議焉夫歲考之例不許一名不到其不到者立行黜革而與考者自一等以至六等既有關於榮辱亦頓生其勸懲若科考則自一等至三等而止有榮無辱故有志進取者固奮勇爭先驚名觀場者亦逐隊而至當其執卷苦吟彼曰爲場事而來也此亦曰爲場事

而來也若場已過矣而仍曰補科揆之於實則非科徇之於名則無補徒使士子多一番之考則多一番之冊卷學臣多一日之考則多一日之耽延微臣冒昧敢請 皇上敕部通行凡場前未經科考者於場後止補試童生入學而生員補科槩行停止省無益之具文卽收考試之實效矣至臣在楚言楚更有不得丕亟爲籌議者查湖北八府湖南七府二州前任學臣之歲考者止有湖北八府新任學臣之接行歲考者亦止有湖南長衡岳三府郴州一州業已將歲作科進場矣其場後應補文武生童歲考者尙有四府一州若再補科考則應補北南十五府二州生童亦考又有三年內應考十五府二州文武生童之歲科夫楚省幅幘遼闊水陸幾數千里以三年而畢此歲科兩考猶恐時日有限較閱不暇今以三年而欲行北南十五府二

州之一歲兩科又補湖南四府一州之歲試毋論計程難徧將
來必又遲悞卽盡力奔馳勉強告竣而精神疲於道路心志迫
於期會其衡文必多率略課士必不周詳苟且以應勸懲不當
非所以仰體 皇上慎選學臣論才升俊之至意也臣冒昧
敢請 皇上敕部速行湖廣學臣將未經歲考之四府一州於
場後卽行補考其未經科考之十五府二州止補考童生入學
而生員科考概不必補俾學臣三年內從容較藝盡心於應考
之歲科而不敢輕忽以從事庶副試期之定限而併收考試之
實效矣

特參縣令重耗累民疏

該臣看得湖南地處邊徼從前各屬徵收錢糧大等加耗積弊
相沿臣受事以來仰遵力減加耗盡革私徵之 聖諭誥誠州

縣務期實力革除乃有瀏陽縣知縣申○者抵任之初頗稱自愛臣每加獎勵詎料近日頓改前操重等加耗民怨沸騰似此欺上病民之員實難一日姑容所當特疏糾參請旨革職與有名蠹役及受害人等一併嚴提究擬以肅官箴再臣數月之內三參重耗總由布政使董昭祚在任負恩溺職縱庇貪婪屬員倚恃無忌臣亦不能覺察受其欺朦及該司既經丁憂復於五月間親訊武陵縣馬□重耗將知府藩司一併糾參各屬貪婪畢露始難掩飾臣故不避嫌怨累疏題參至臣備官五載尙有不肖劣員蔑視功令任意婪贓臣罪實深臣心滋愧併請聖主將臣立賜罷斥以爲不職撫臣之戒其申□重耗亦係丁憂布政使董昭祚任內之事並未查詳相應併參

題定荆關川木圍量則例疏

臣思川木園量則例必須查明舊日之例始可酌定今日之議
。檢査荆關樵志杉木原照松木圓長派料今該關則例又另定
。辰常杉木圓長派料之例且今併將川木亦照辰常杉木圓長
。則例徵收圓則按寸增加長則按尺增加但其間派料多寡殊
。有舛錯如該關則例刊載圓二尺長三丈一尺派料一錢二分
。圓三尺長三丈一尺派料二錢圓四尺長三丈一尺派料四錢
。圓五尺長三丈一尺派料五錢並無加長字樣行據原任荆關
。同知翁年倫呈稱卑職任內徵收有圓二尺三尺四尺五尺各
。長三丈一尺者俱遵照則例一錢二分二錢四錢五錢起算並
。不加長等情而則例內如圓至二尺九寸每多一寸加一分二
。釐長四丈每多一尺加一分共應三錢一分八釐是圓二尺九
。寸之派料又多於圓三尺之派料矣又如圓至三尺九寸每多

一寸加一分七釐長至四丈每多一尺加一分二釐共應四錢六分一釐是圓三尺九寸之派料又多於圓四尺之派料矣又如圓至四尺九寸每多一寸加一分三釐至四丈每多一尺加一分共應六錢七釐是圓四尺九寸之派料又多於圓五尺之派料矣再不加長計之如圓二尺長三丈一尺派料二錢而圓二尺九寸長亦三丈一尺反派料二錢二分八釐圓五尺長三丈一尺派料五錢而圓四尺九寸長亦三丈一尺反派料五錢一分七釐是圓三尺之派料反少於二尺九寸圓五尺之派料反少於四尺九寸矣姦胥因而舞弊商民共苦不均又杉木例除鼻五尺上圍圓長至四丈而止今該關四丈之外俱違例增長故各商以川木頭粗尾尖若梢雖尖細亦照頭之圍圓尺寸按長一尺卽加銀若干則尖細之梢每丈俱完稅二三錢不

等紛紜呼籲求另定川木圍量則例今臣遵旨前赴荆關沙市地方親自圍量除將荆關現行則例鈔錄分送部科查對外該臣看得各關徵收木稅止計圍圓之大小而不論木植之長短惟荆關按寸加圓又復按尺加長然相沿已久未便更改惟現行則例圓少之派料反增於圓多之派料又違例於四丈之外仍復加長此各商所以有派料不容互異木梢不便加稅之說也今臣酌議圓二尺長三丈一尺照則例抽銀一錢二分起算圓長俱遞加圓多一寸加四釐多二寸加八釐多三寸加一分五釐多四寸加二分多五寸加三分多六寸加三分六釐多七寸加四分九釐多八寸加五分六釐多九寸加七分二釐共抽銀二錢九分二釐以上每長多一尺加四釐由三丈二尺加至四丈共加三分六釐又圓三尺長三丈一尺照則例抽銀二

錢起算圓長俱遞加圓多一寸加一分一釐多二寸加二分二釐多三寸加三分六釐多四寸加四分八釐多五寸加六分五釐多六寸加七分八釐多七寸加九分八釐多八寸加一錢一分二釐多九寸加一錢三分五釐共抽銀三錢三分五釐以上每長多一尺加六釐由三丈二尺加至四丈共加五分四釐又圓四尺長三丈一尺則例派銀四錢但以圓三尺派料二錢較之似乎過重今議抽銀三錢五分起算圓長俱遞加圓多一寸加一分六釐多二寸加三分二釐多三寸加五分一釐多四寸加六分八釐多五寸加九分多六寸加一錢八釐多七寸加一錢三分三釐多八寸加一錢五分二釐多九寸加一錢八分共抽銀五錢三分以上每長多一尺加八釐由三丈二尺加至四丈共加七分二釐又圓五尺長三丈一尺則例派料五錢但仍

照五錢似乎稍輕今議抽銀五錢五分起算圓長俱遞加每圓多一寸各加二分多至九寸加一錢八分共抽銀七錢三分以上每長多一尺加一分由三丈二尺加至四丈共加九分再查圓五尺九寸抽銀七錢三分以三丈二尺加至四丈計加九分二釐共八錢二分較原則例圓五尺九寸合長多九尺計算該八錢一分五釐已實多五釐而圓少者派料亦少圓多者派料亦多庶輕重較然關吏不得高下其手而增減有定商民永杜騙索之端矣至川木原係頭粗尾尖臣親赴木廠細加圍量自除鼻五尺以上至四丈之處雖亦尖粗稍別但照則例量至四丈而止則尖細之稍俱在不計可無頭粗尾尖之慮亦不必如權誌所云首尾大小懸絕必折半而後可矣臣照荆關現在則例改正參差舛錯酌擬川木圍量則例按其大小長短而遞加

派料並無虧損造冊分送部科查核伏乞 皇上睿鑒敕部議
覆遵行抑臣更有請者荆關改同知爲部差必須剔除蠹弊裕
課恤商方不負 皇上設立關部之意乃有棍徒王四卽王法
公鑽充內幕又有馬大成鑽充書辦內外勾通舞文弄法又有
周邦等盤踞關津甚至馬牙犯罪之李朝宗亦投充關役商民
之脂膏有限此輩之吮吸無窮若不亟爲驅除蠶食既多正課
必損將來或不敷額則臣亦難免欺罔之罪伏乞 天語申飭
立行革逐另募殷實老成小心辦理庶關役不致病民以病
國矣又查關口之設所以防漏稅也荆關原有十大關皆沿江
分列以防過往之走漏如虎渡口在荊州南岸實爲大江迤北
之要口凡船隻貨物經由者悉應上稅誠不可少乃虎渡口之
南百里外又添一關曰港口渡不知起自何年今已相沿成例

亦皆撥役把守徵收但大江之南既有虎渡口以防漏稅而港口渡又在虎渡口以南百有餘里並非大江漏稅之處往來船隻不過水鄉出入小舟卽有貨物亦是近地貿易小販與荆關何涉今概行收稅關差雖有耳目豈能覺察於百里之遠歇家胥役借名勒索正額之外復有私徵正耗之外復多倍取此等銀錢既不歸於國帑亦并不入於關差徒使姦徒飽腹而窮戶吞聲臣舟經此地士民環遶泣訴臣稱請將此關革除或將此稅併歸虎渡臣非敢越俎言事但思此關之去留不係稅額之贏缺臣既奉差目擊民情激迫仰體皇上仁覆如天惟恐一夫不獲故敢據實上聞應否伏候聖裁

請歸併關稅以便商民疏

該臣看得靖屬天柱縣鷓鴣關額徵木稅銀兩一案據布政使

詳據靖州詳議天柱溪河險狹木簍抽稅不便查柱邑居辰郡上流木商自柱抽稅之後必由辰州府經過方得再往他處發賣辰府既設木稅商民自必照例輸納請將鷓鴣關裁去歸併辰州府稅內徵解等因前來臣思設關原以裕課苟有不便於商必須從權更正今天柱縣鷓鴣關每年額徵稅銀止三十兩爲數無多且地處邊徼溪河險狹商民納稅不無停泊守候之苦并有水險沖散之虞實多不便相應題請將天柱縣之鷓鴣關竟行裁去其應徵稅銀三十兩統於辰州府木稅內徵解俾稅課無虧商民稱便臣謹會題

特參劣員以清吏治疏

該臣看得茶陵州參革知州李□先因虧空錢糧貪婪勒派經臣會參奉旨革職提審在案其印務飭委岳州府通判邊□

署理詎該通判署事未久竟肆貪虐臣據兩司揭報一面訪拿
蠹犯究訊以憑會參一面改委攸縣知縣張臣德接署隨據張
臣德報稱奉委前往茶陵州接署有刁民糾黨圍住州衙辱罵
署州邊通判貪戾虐民見卑職到州隨卽解散又據長沙府知
府崔岱齊詳稱拿獲茶陵州蠹役櫃書譚啟先等供李知州因
虧空錢糧見知府盤查說少不得要參就私改等子收本年錢
糧每兩有加一五六火耗邊通判到任見了百姓亂打火耗比
李知州還重三分百姓不服圍了衙門罵他見攸縣接署隨卽
解散又據署州張臣德呈報拏獲爲首刁民顏佑舍劉玉錫譚
文士譚三吉收禁等因前來臣查李臣任內虧空錢糧私改大
等重加火耗署州事岳州府通判邊臣接篆效尤加耗更甚以
致州民圍衙辱罵大乖職守似此貪虐之員誠難姑容所當據

詳會題請 旨將邊 革職與蠹役刁民一併嚴提究擬以爲
重耗虐民者戒

三叩 聖恩預撥兵米疏

該 臣 看得湖南各營兵丁月米例係七月開徵請將上年解存
米石預撥次年春夏二季兵米一案 臣 兩經會疏具題兩準部
覆毋容議在案 臣 何敢再爲瀆請惟是兵丁月米係計日待哺
之需而小民輸將適當青黃不接之際 臣 每見各營兵米於正
月卽赴州縣支領彼時地丁尙未開徵南秋從何輸納兵既苦
於守候不無枵餒之虞民又無可拮据不免敲撲之慘兵不能
待民不能完則州縣官那移應墊反虧應解之項者情亦有之
臣 查上年解存充餉南秋米石存貯該道俟本年奏銷後於九
月內準部文折銀解部該道於十一二月間纔委員起解則春

夏之時前項米石乃貯道候解之項也貯道候解之項何不可
爲撥給兵米之需臣故請以上年解充米石預撥春夏軍糈其
秋冬二季就於七月新徵內支給嗣後每年徵收南秋除現給
本年秋冬二季及留充下年春夏二季兵米外餘存仍照例折
徵充餉今準部覆內稱若預爲撥給其中恐有該管官員將上
年存贖米石致有虧空希圖掩飾情弊但前項米石解貯該道
約將一年方行折解若有虧空掩飾情弊則應在貯道一年之
內而不應在預撥春夏二季之時況兵丁需米刻不容緩照數
領米毫不容少誰許掩飾虧空而肯以無爲有以少爲多此又
情理之易見者如或有虧空掩飾情弊一經發覺臣願與該管
官一體從重處分爲扶同欺瀆之戒又部覆內稱歷年兵米俱
於本年南秋米內支給遵行已久不便遽行更張臣查康熙四

十六年九月二十三日準戶部咨爲奏銷康熙四十五年錢糧等事內開一存贖米一千二百一十七石九合穀二十四石五斗零應令候撥兵糧夫四十五年存贖南米既令候撥兵糧則四十七年存贖米石似可一例預撥臣又伏讀康熙四十二年三月十八日 恩詔一直省地方有現行事例不便於民者各該督撫詳察開列具題該部確議酌量更止一督撫係封疆大吏地方聞見必真凡關係籌餉節用裨益兵民事宜如有確見著據實條奏欽此臣以一介庸材荷 皇上高厚隆恩謬任封疆既見事例不便於民而以不便更張之部覆因循中止是臣不能奉行 恩詔以重負 皇上也且臣伏見 皇上仁覆蒼生恩覃薄海蠲租發粟動以數百萬計今動支存解之南秋撥給春夏二季之兵米既無損於 國課甚有益於兵民而以母

庸議之部覆不再據實上請是臣不能體 皇上之心而重負
皇上也臣故不辭冒瀆之譴再敢瀝陳伏乞 皇上電察臣
前二疏將存貯候解之南秋預撥春夏二季之兵米則兵獲
飽騰之樂民免追呼之苦永戴 皇仁於億萬年矣

遵 旨明白回奏仰祈 睿鑒疏

康熙四十七年九月十一日準吏部咨開爲特參不敬等事考
功清吏司案呈據內閣學士兼禮部侍郎宋大業奏爲特參不
敬溺職之撫臣以肅官箴以尊 君命事一疏康熙四十七年
八月初一日奏本月十七日奉 旨這所參事情著趙申喬明
白回奏該部知道欽此等因鈔疏移咨到臣欽此欽遵竊臣至
微至陋疊荷 皇上高厚隆恩破格拔擢忝任封疆併奉有綬
輯撫安之 御書力減加耗盡革私徵之 諭旨臣日夜冰兢

殫力奉行猶恐積習難除未由報稱幸我 聖主寬仁姑容竊

位今內閣學士臣宋大業奉差南嶽參 臣不敬溺職蒙 皇上

不卽加譴僇令 臣明白回奏誠天地之覆載父母之怙恃感激

涕零惶悚無地伏思南嶽爲 皇上主壽之山大小臣工捐俸

修建 臣亦經營數載幸獲告成節省萬餘報歸 內帑仰邀

宸翰寵錫 天章遐陬莫不歡幸 臣心倍切欣榮乃當典禮方

慶有成而 臣名隨登白簡撫衷自省惟有痛心 臣復何辭敢瀆

天聽但旣奉明白回奏之 旨謹不避斧鉞披露肝膽一一

爲我 皇上陳之一宋大業參 臣疏稱恭捧 御書匾額

御製碑文臨楚自直隸湖北經過地方督撫諸臣俱穿朝服率

屬員叩頭行禮獨趙申喬違禁帶雨纓帽穿素衣並不率同在

城文武官員行禮輕褻 萬壽天章等語 臣查本年五月十三

司道官員瞻仰褻慢不恭等語臣查五月十三日夜自龍陽趨行於十五日至長沙而大業亦於十六日抵長沙臣卽於十七日穿朝服頂帽赴大業公館前堂所安御書寶櫬前行三跪九叩頭禮隨請瞻御書據大業家人云御書安於後堂房內臣隨趨入始遇宋大業於前堂之後因同至後堂請出御書恭捧久觀伏見聖筆揮灑具山凝嶽峙之精神極鳳舞龍飛之體勢洵與乾坤同其貞固日月並其光華美善既有難名贊歎亦莫能罄隨請大業收藏而別至在城司道各員於三月內大業初到長沙各官已經叩頭行禮瞻拜御書臣到長在後毋庸再爲率領且臣瞻拜御書原爲請觀宸翰若叩拜而不請觀雖三尺童子亦決不出此而大業捏稱延至五日始至一觀又仍帶雨纓帽不穿吉服以必陷臣於罪臣實不知其

何心也伏候 聖明鑒奪 一宋大業參臣疏稱南嶽爲 皇

上主壽之山修建廟宇應極其慎重堅固華麗昭垂奕禩乃趙
申喬率從事正樑木料濫用細小殿庭之內俱用亂石舊磚
鋪砌兩廊現在圯側正樓地板俱係蠹腐板片長短不齊正殿
不用琉璃瓦丹雘俱用薰金土硃外廊宮館仍然坍塌種種不
堪難以枚舉況祝 聖茶庵係奉 旨建造十餘處欽遵在案
卽三尺黃童亦知有增無減乃趙申喬敢於違 旨擅行減造
五處且制度粗率規模狹陋以此祝 聖褻慢已極顯有包藏
等語臣查南嶽工程原有估冊移會原任督臣喻成龍分送多
羅貝勒及工部在案臣飭委衡州府知府孔興滋一一遵照監
督修造工程現在有目共覩毋庸臣與大業置辯惟請 皇上
另遣廉明大臣覆行查勘不難立見至湖南窰匠並無綠色黃

色之筒瓦故皆以本色估用先經會疏題明而茶菴因地制宜必附近居人以便照管亦將建菴之數會疏題報在案其廊外卽係僧道房不過往來偶借歇宿並非宮館原估亦無修理僧道房之處如果有細小圯側虧少估料及粗舊長短薰金土硃種種不堪則修理嶽廟經手人員與監修之衡州府知府孔興滋俱遵宋大業先期調集伺候查詢大業在嶽廟時何無一言究問而離嶽半月有餘忽捏造以必置臣於死臣實不知其何心也伏候 聖明鑒奪 一宋大業參臣疏稱趙申喬於五月十三日在常德具疏內稱星馳南嶽親身辦理 御匾碑文等語何遲至四十餘日於六月二十三日始到南嶽廟一宿卽歸並不親身料理欺誑具題又不建造 御碑亭臣在長沙四月言之再三趙申喬但云無地可建督臣郭世隆於七月初十日

至嶽廟見無碑亭深以爲非卽指嘉應門外庭中可建趙申喬始唯唯語塞則四月有餘尙在睡夢中以致立碑之時無碑亭以壯觀瞻不知何故擅將奉旨建造之御書樓下西偏毀

牆掘地觀者驚駭怠玩

聖製本無崇奉之實心昭然可見等

語

臣查五月十三日

臣自常德起程原擬卽往南嶽親身料理

御匾碑文及本日遇宋大業於龍陽迨抵長沙而大業亦留長沙詢之司道則云兩月以來御匾已經刊就卽永峙南維

碑亦已鐫成惟

御製南嶽文碑石寬大高長在於耒陽縣採

運尙未到嶽

臣思石旣未到

臣無所用其手足之力卽撥標弁

常進廷協同衡山縣星夜趨運

臣暫留長查盤司庫錢糧核對

奏銷冊又六月秋審屆期

臣遵例會同司道秋審各犯及據該

弁報碑石拉至嶽山一面先令磨礮平正

臣於六月十九日拜

發秋審本卽於二十日親往嶽山督同衡山縣敬視刊鐫並非
欺誑具題其所以仍回長沙者因安奉兩碑不敢遵宋大業所
云而再與商確也臣在鎮筵接大業致書內稱建立碑亭曾與
成少參相度位置但此工程非旦夕可辦必須預示早得興工
庶不致畏首畏尾推諉觀望等語臣隨手諭驛鹽糧道成光遵
照去後旋據該道印稟內稱蒙諭宋學士有催促建立碑亭之
說宋公前曾徧爲相度基地無可建立之所有仍在 御書樓
下之意但嫌樓之舊制稍低四面簷柱太細令署衡州府拆而
改造伍牧以前建 御書樓已經題達不便擅拆爲覆是以中
止成光亦曾丈量樓下原高一丈五尺五寸新碑約高一丈五
尺儘可豎立不謂其猶有建立碑亭之說等語俱有成光印稟
可據又據護衡州府事桂陽州知州伍士琪印稟內稱宋閣學

於三月二十五日行香之後面言 御書樓應卽拆毀改造亟
爲催促士琪以曾經題達未敢輕動之言婉轉回覆等語現有
伍士琪印稟可據是宋大業之所謂建立碑亭卽欲拆毀 御
書樓改造以爲碑亭也但 御書樓無敢拆毀之理且樓下儘
可安碑而大業之所以必欲拆毀改造者緣四十年宋大業面
委長沙府知府姜立廣監修 御書樓立廣隨領司庫銀五千
兩修理及查驗工程殊多率略侵冒錢糧現在核追故大業欲
拆毀改造以滅其委修之跡而去其冒銷之證也 臣赴南嶽時
與宋大業面商作何安奉兩碑據大業云碑亭無地可建自應
總立於 御書樓下但三開各安一碑則碑石大小不同應將
前暨 光輔紫宸碑起出而將 御製南嶽文大碑立於中間
之後層再將新舊兩匾字碑並立於大碑之前層 臣以位置出

自 欽差自應祇遵及臣到嶽親詣 御書樓下相度形勢如
一閒同奉三碑則體制殊爲逼窄且後列一碑前列兩碑則後
碑盡爲前碑所掩又 光輔紫宸碑豎立已經數載若一起動
不能保無缺損臣實不敢冒昧遂連夜趕回與大業再商妥局
而大業亦不能裁決惟云聽地方官酌行而已是以該道成光
先期往嶽仍擬照三閒各安一碑及臣隨同督臣郭世隆與宋
大業同在嶽廟共商督臣亦以三碑大小不同未便俱安一處
且 御文碑石重大若運進嘉應門挽擡不易故議建碑亭於
嘉應門前今大業捏稱在長沙言之再三如果與臣一言則大
業在嶽四十餘日何不率同道府指地造亭而必將 御書樓
拆毀改造者更欲何爲如以道府不遵拆毀 御書樓故大業
仍欲建造碑亭則大業六月中何以尙有三碑同列樓下中間

之說卽宋大業移咨擇七月初十及十一日敬懸 御額建立

碑文何以亦無一語詢及碑亭之曾否告竣可見大業意中原

未嘗有建立碑亭四字矣今因七月初十日有碑亭之議欲飾

其從前不議碑亭之非而反誣臣怠玩 聖製以必陷臣於罪

臣實不知其何心也伏候 聖明鑒奪 一宋大業參臣疏稱

壽嶽告成 皇上親灑宸翰 御製碑文 命臣齋捧到楚在

衡祝釐建醮眞普天同慶萬年盛事趙申喬應百倍踴躍其效

頂祝凡屬官百姓偶有過愆應念 皇上萬壽升恆之慶每事

仰體從寬卽有大過亦應候懸圖立碑吉祥禮成之後再加指

摘亦未爲晚何以正當 盛典臨楚之時幾月以來但見趙申

喬舉動發怒全無歡喜參劾咨革無虛日拘拏敲撲無甯時使

官民嗟怨哀號不絕於耳揆於仰祝 無疆之臣謹推 恩及

下之微誠大相悖謬等語臣思壽嶽工成御書寵賁率土臣民共切無疆之慶而經營既出臣手權躍更倍尋常況當宋大業到長之時臣奉旨已先往鎮筵實與欽差閣學二格共事之時多而與大業周旋之日少乃遽謂臣幾月以來舉動發怒全無歡喜豈大業能神遊千里之外乎又云參劾咨革無虛日則已情見乎詞矣揆其意不過以臣參案併及丁憂布政使董昭祚而咨革乃管演目連戲之楊芳耳但重耗劣員臣原奉有據實糾參從重治罪之旨而縣丞之賣米得贓經歷之演戲不擇以及矜貢之保留守制皆有不得不參者而大業心有所爲遂加臣罪又稱拘拏敲撲無甯時臣於查盤董昭祚司庫見其司吏朦混造冊希圖侵蝕提訊數役臣實有之此外別無拘拏別無敲撲而大業混指以爲臣罪欲洩他人之憤怨而

竟忘自己之比私臣實不知其何心也伏候 聖明鑒奪 一

宋大業參臣疏稱上年十一月十二日壽嶽神像開光之時百

姓僉云小民受 聖主洪恩五十餘年且 盛典難逢願各捐

貲唱戲幾日以申萬民踴躍之情遞呈於巡撫趙申喬大怒不

允立刻將戲臺拆毀聲言柳責眾民驚散是趙申喬不欲合萬

姓之歡心以奉 一人而阻遏小民愛戴之誠律以無將情罪

可惡衛山百姓至今不服官民可證等語臣查康熙四十六年

十一月十二日壽嶽神像開光臣親至嶽廟搭臺演戲三日以

祈神佑於萬年旋有近廟居民亦欲捐貲唱戲臣婉諭以敬神

演戲是我等臣子之事爾等窮民若亦捐貲唱戲恐開斂派之

端反爲未便爾等既愛戴 皇上只在神前叩頭祝 聖便見

你門一片敬心眾民皆歡喜叩頭而退有何大怒拆臺有何聲

言柳責宋大業既云官民可証卽民之姓名難以周知而官之姓名諒已熟悉大業既有訪聞之語自有傳說之人何不舉出一人以爲明證而乃捏造無影之詞加臣以情罪可惡坐臣以無將大辟臣固不足惜天下督撫從此皆畏 欽差之可以捏定爰書手操生殺莫不心驚膽裂竭力逢迎則大業之心誠屬何心至大業到獄諭執事官於獄廟二門前建臺演戲一月派令衡州府經歷楊芳專理其事自閏三月十五日爲始每日演戲大業亦每日登樓置酒高坐臨觀乃於十八日本戲演畢之後忽扮雜劇一齣觀者無不驚駭復於十九等日接演目連全本種種褻慢公然無忌臣據署布政司事按察使耶廷棟桂陽州知州伍士琪長沙府知府崔岱齊衡州府知府常口驛鹽糧道成光衡永郴道孫調鼎等各詳到臣思大業唱戲祝 聖

而於內殿建醮之時外臺搬演目連全本殊乖臣子愛敬之誼
應即據實糾參但以瑣屑之故不敢輕瀆 宸聰是以於六月

二十九日會同督臣咨明吏部請將管戲之楊芳立賜斥革併

移咨大業在案今大業懼臣發覺其唱目連戲之罪而反捏稱

臣於嶽神開光不允百姓唱戲怒拆戲臺聲言枷責但大業誣

臣絕無一証而大業之唱演目連直至七日則萬目共覩萬民

共駭究其情罪似屬可惡律以無將似有難逃此又臣至今日

不得不直陳以候 皇上之乾斷者也伏候 聖明鑒奪 一

宋大業參臣疏稱七月十二日撫臣趙申喬會同臣及總督司

道諸臣在 御碑處所叩頭行禮臣見位置舛謬即向臬司郎

廷棟糧道成光切責撫臣慢忽是日臣即起程復 命行至三

十餘里見撫臣率同司道等官飛騎前來攔阻於道強臣復回

衡山希掩過愆竊思臣事竣回京 大典所係何故擅行稽留

攔阻復 命等語臣查七月初十日臣在嶽廟因碑座龜趺重

大不能刻日運到隨懇宋大業稍遲數日俟碑座運到公同暨

立然後起程而大業堅持不從且諭於 御碑處所叩頭行禮

至十二日遵宋大業諭公詣 御碑處所大業領班俱叩頭行

禮畢隨留大業用飯相約同回長沙恭請 聖安送之北上豈

大業於用飯後忽向司道口稱何故在於 御碑處所行禮責

臣不是及大業登輿後臣聞此言卽向督臣面說 欽差要在

御碑處所行禮十二日又是 欽差領班行禮乃行禮之後

反說我們不是將來恐遭毒計臣隨策騎同司道追宋大業於

五里之外邀其回嶽暨碑大業必不肯旋臣隨率同司道卽於

道旁望 闕跪訴大業不得已而回臣懇其留嶽數日俟碑座

卷之三十一

三

遷到豎立後行又必不肯因諭奉碑移至建亭處所搭架豎起
候於次日行禮臣祇遵大業命星夜僱夫蓋厰移碑併搭架豎
碑至十三日午時臣隨督臣併率各官朝服叩頭而大業兩纓
素服領班行禮臣又向大業言碑移在此碑座尙未到我應在
此督催碑座豎立之後方敢回長沙臣隨於五里外跪請 聖
安送大業回京此七月二十三兩日情形也大業反覆無常
設弄害人臣恪凜 天威恐貽後患而大業反捏稱臣擅行羈
留攔阻復 命臣實不知其何心也伏候 聖明鑒奪 一宋
大業參臣疏稱趙申喬之妾張氏於六月初二日身故初五初
六初七等日擅令兵丁摘纓穿素 御書密邇肆無忌憚長沙
官弁兵役可証等語臣查六月初二日臣妾張氏在署病故以
非正配概不敢受弔奠何有兵丁摘纓素服之事臣標馬步戰

守兵一千一百餘名如果摘纓素服豈能掩人耳目宋大業既稱長沙官弁兵役可証何不舉出官弁兵役一人姓名以爲明証乃以全無影響之事恣其含沙噴射之毒必欲摭拾無端以陷臣於罪臣實不知其何心也伏候 聖明鑒奪 一宋大業臣參 疏稱百姓云趙申喬巡撫偏沅以來年年荒歉今歲自御書到後壽嶽效靈湖南兩陽時若五穀豐登數年以來從未有此大熟真可謂湖廣熟天下足矣江南之米正在騰貴乃趙申喬於七月內新米既出之後仍然禁糶以致積米之家不敢出賣販米之商不能出境是不特欲商賈含怨裹足并欲使江南數百萬生靈艱於粒食全不仰體 皇上截留振恤之盛心惟自逞威福忍心害理等語臣查七月初六日臣隨督臣前赴嶽廟二十一日安座豎碑訖隨由水路順道回過長沙檢查荆

文淵閣書目

關一案文卷卽赴荊州遵 旨查定川木則例已經題報在案

是七月中臣未嘗在長沙也何由而禁販米之商卽宋大業於

七月初五日往衡山十七日自長沙回京則大業亦未嘗在長

沙也何由而知長沙之禁總之大業聽人授意捏造無稽臣實

不知其何心也伏候 聖明鑒奪 一宋大業參臣疏稱本年

六月十二日因開倉未幾復行閉倉以致激變長沙府民盈千

累萬頃刻罷市圍撫臣之署呼名辱罵毆現任之官流血遍體

以致圍繞竟日闔城驚駭撫臣身爲大吏閉門不出有何面目

忝居民上大乖巡撫之名等語又宋大業參臣疏稱布政司係

二品大吏豈有趨申喬於本年六月初九日出示勒令百姓向

原任藩司董昭祚處索米橫鬧而百姓不鬧董昭祚反鬧趙申

喬因此羞慚任性參劾屬員嚴拏百姓不顧他人之功名性命

但圖巧掩一己之罪愆竊思百姓當嚴輯其安靜豈可反引導其刁風楚南苗民雜處之地撫臣職任封疆出示唆撥激變良民罪無可逃鈔錄告示恭呈 御覽等語此二條總屬一事總爲董昭祚而發 臣查上年春穀價騰貴 臣會同督臣石 口疏請

皇上將見存倉穀減價出糶蒙 恩俞允小民得以資生本

年長沙四五月閒穀價騰貴亦如上年 臣五月旋長目擊情形

憂心如焚且民已艱食不及具題候 旨是以 臣令長善二縣

徑發倉穀減價糶與貧民俾得餬口仍於冬閒購買還倉此雖

臣之違例糶穀亦救饑如救溺之意也奈開倉之後買者日多

誠恐倉穀有限不敷出糶又訪聞米貴緣由皆因姦商販買米

石串通牙棍囤積倉厥盈千累萬恐地方遵禁查阻該商央囑

董藩司公行出示明放米船以致千萬之米揚帆直下去米既

Page not available.

Please help scan and add.

页面不可用。

请协助扫描添加。

之徑行減糶則民情洶洶更不知何狀矣且此案自有督臣審
理與大業何干而大業曲徇昭祚先爲出脫反捏稱臣峻撥激

變臣實不知其何心也伏候 聖明鑒奪 一宋大業參臣疏

稱趙申喬勒令各州縣加一火耗內抽捐康熙四十三四兩年
火耗銀十萬兩不奉 明旨任意勒捐屬員怨忿有司府州縣

解收批文可據等語臣查康熙四十二年奉有力減加耗盡革

私徵之 上諭臣莅任以來頒布條告嚴加禁飭務期湔除陋

弊仰副 皇上休養黎元至意但私派既革則地方一切雜費

俱取給於巡撫而臣一介寒官點金無術仰屋徒嗟一種萬不

得已苦情至今日而猶瞻顧隱諱不瀝陳於 皇上之前則將

來再無可言之地併無可言之時臣橫被惡名死不瞑目查康

熙四十二年六月閒宋大業奉 旨祭告南嶽并齋 御書匾

額一到長沙虛張聲勢將臣多方恐嚇動輒加以不敬有原任長沙府知府姜立廣從中傳說逼要多金方容做匾懸掛臣敬

畏天使只得受其牢籠許以三千兩不允加至五千兩又不

允必加至七千兩纔爲首肯臣一時無從設處隨令姜立廣向

陞任布政使施世綸暫借庫銀卽令姜立廣轉送大業銀七千

兩隨禮銀七百兩又幕賓劉□張□各索銀一百兩共七千九

百兩現有過交姜立廣可証又姜立廣領司庫銀五千兩建造

御書樓俱議捐四十二年俸工補項至四十二年冬奉旨

勦撫紅苗大師雲集一應鑼鍋帳房運送米豆僱覓夫舡供應

犒賞諸費皆借帑應用而四十三四兩年俸工已捐修嶽廟其

庫項不可虛懸據署布政司事張仕可詳稱各州縣願將加一

火耗之內扣捐五分清補軍需用項通詳督臣暨臣批準至四

十四年因修道路橋梁僱備江南船隻借動庫銀又將四十五年俸工捐補以上各項收銀者布政使董昭祚也用銀者布政使董昭祚也臣不特毫無染指亦且並未經手現有董昭祚可証至四十四年並未捐耗而大業捏稱勒捐康熙四十三四兩年火耗銀十萬兩臣實不知其何據也惟是大業勒銀一項與之固不能無罪但彼時實受其逼勒倘不震怒則今日之彈章早見於四十二年矣臣豈不知今日言之而罪亦不免然今日奉旨明白回奏而仍不盡言臣罪益深大業本年再至意中欲援舊例但至今日派不可派捐無可捐僅令各官共湊送銀一千兩隨禮銀一百兩大拂其意遂必欲置臣於死但臣甯言之而死於君父之法不敢不言而死於大業之手伏候聖明鑒奪

一宋大業參臣疏稱原任桂陽縣知縣朱口將撫臣

苛刻險惡劣蹟刻揭遍傳若趙申喬果正已率屬何至屬官怨恨乃爾原揭恭呈 御覽等語查朱 於康熙四十五年署藍山縣印 據衛州府詳報朱 虧空錢糧又且捏飭批迴倉穀微爛缺少重復以欠報完隨卽題參聞朱 挾仇川揭併稱曾解 銀三百兩但查康熙四十二年據里民葉 告朱 碾米派費併賣米得價共銀八百餘兩 以事在 赦前免其題參止追充地方公用據朱 一次解司庫銀二百兩 卽檄布政司撥補軍供現有布政司印冊可據又 次移交宜章縣銀一百兩爲奉諭總督移會公發安撫投誠黃珍家口之費現有宜章縣印文收領可據此外亦從寬豁免 並未見其絲毫任被誑言總置不問朱 旋亦悔過已經三年矣查定例特嚴反噬之條而宋大業必句通被劾之員以砌成欵蹟 實不知其何

心也伏候 聖明鑒奪 一宋大業參

臣

疏稱趙申喬全不仰

體 皇上寬大之德一味陰毒慘酷湖南司道府州縣以及雜

職等官四年之中參劾二百餘員吹毛求疵顛倒是非喜怒狂
悖功名性命供其魚肉以致各官朝不保暮救禍弗遑何暇盡
心民事卽百姓皇皇若喪旣艱口食之資復有身家之慮坐卧
不甯手足無措吞聲飲痛告訴無門被害官民可証等語

臣

查

自蒙

恩拔擢以來惟以

皇上寬大之心爲心從不敢苛求

小過從不敢偏執已見其屬員中或私派或重耗或倉庫虧空
或承審不當例不得不據實糾參然內有部臣之核議外有督
臣之審讞要皆決自 宸衷遵奉施行而宋大業謂

臣

吹毛求

疵顛倒是非喜怒狂悖功名性命供其魚肉又謂

臣

四年之中

參劾二百餘員夫大業旣知其二百餘員矣則何不指其姓名

以見臣之濫參濫劾又何不舉其某案爲吹毛求疵某案爲顛倒是非以見臣之妄參妄劾也臣奉有力減加耗盡革私徵之

上諭原期息事甯人使羣黎樂業今大業不參臣縱私派則

臣屬已無私派矣不參臣縱加耗則臣屬已無重耗矣以無私

派無重耗之時窮鄉僻壤方詠歌於堯天舜日之下而大業反捏稱百姓皇皇若喪旣艱口食之資復有身家之慮坐卧不甯手足無措吞聲飲痛告訴無門推大業之心必將大開私徵頓加重耗而民間始有口食之資無身家之慮乎大業身在綸扉職司輔導豈應大謬一至於此又稱被害官民可証何不知其被害者何官何民以作明証而含糊一語陷人大罪臣實不知其何心也伏候聖明鑒奪以上諸條臣謹就宋大業所誣而一一剖陳伏念臣迂愚拙直之素性久在聖明洞鑒之中

居官率屬之短長亦難逃 聖主照臨之遠臣本毋庸置喙但

既蒙 皇上寬慈令臣明白回奏如有片言隻字之欺 皇上

卽或恕臣而天地鬼神亦當誅殛但臣受 恩深重恪遵 諭

旨私徵必期盡革加耗必期力減如有藐法不遵重爲民害者

亦遵奉 皇上據實糾參之 諭不敢姑爲徇庇以長官邪屬

員雖照例不乏養廉而實無所肆其貪恣既憚約束之過自生

畏苦之心臣若於屬員有一毫交際於庫帑有一毫動用則如

被劾之董昭祚等何言不肯說何事不可爲況勒捐十萬出入

難掩而尙俟今日之宋大業代爲參奏哉然宋大業之所以爲

此者亦有故焉一則因臣發其唱目連戲之事而借此以緘臣

口也臣之咨革管戲楊芳在六月二十九日使臣果有劣蹟可

參則何不參於六月二十九日以前而遲延一月以爲先發制

人乎一則因臣將獄工餘賸銀兩先行啟奏而不得遂其私也
臣在鎮筵於閏三月內接原任布政使董昭祚稟帖內開宋大
人云雖 皇上命我查看工程在撫院幾經親臨獄山自然不
錯又云下賸銀子不必啟奏本司因回已報完工萬一駁查數
目故此題明且撫都院以所捐銀兩原爲獄廟既有餘賸及各
物料變價自應聽候大部撥用觀其此番舉動甚是和氣與前
大不相同等語現有董昭祚印稟可據夫獄工下賸銀兩原應
報部充餉今臣盡數啟奏不過自矢不欺之意而豈知已觸貴
臣之隱恨臣謹將董昭祚原齎印稟恭呈 御覽 皇上俯賜
電察則可以知臣今日受禍之由矣至宋大業劣蹟纍纍本當
據實指參祇因幸逢 盛典若遽以 上聞恐有失揚光昭美
之意是以隱忍未言今臣既被參慚負 主恩仰懇 皇上立

賜罷斥以爲不職之戒緣係遵 旨明白回奏事理字多逾格
貼黃難盡併隨本恭呈印稟一合伏乞 皇上睿鑒全覽施行

請將烏鎗編烙發存防患疏

該_臣看得禁止民間私藏烏鎗一案_臣準部咨隨欽遵轉行布
按二司通飭查禁并取該地方官並無私藏印結詳報茲據該
司詳稱湖南地方苗獠雜處深山大澤姦宄易潛雖有防兵不
時搜查尤賴居民守望相助民間向有烏鎗若令其盡行繳銷
改換一尺五寸則器短無以致遠不惟附山居民難以制禦猛
獸且恐崗穴苗蠻或有制人之具居民反無捍衛之資請將現
在烏鎗烙印編號給發收存以備急患等因前來_臣查烏鎗乃
營伍兵器民間原宜禁止已遵照部文通行查禁并取印結另
咨送部在案但湖南所屬苗獠雜處者已過其半而無苗州縣

又多係深山大澤民間向有烏鎗實爲防苗衛身之具若驟行禁止則匪類反得挾凶器以傷人而良民不免束手以就斃所以眾心皇皇恐難禦暴夫地方險易既有不同則烏鎗禁止似難一例伏祈 皇上俯念邊方不可無備將湖南各屬現在所繳烏鎗準令該地方官於木桿之上刊刻州縣姓名烙印編號給發收存以防急患仍嚴飭不許擅帶行走或有商民續請造用者令其照造一尺五寸之式送官刊刻給發如有私藏不送官編烙者照例治罪庶姦宄不致無忌而小民得以自安矣

請遵例仍給旌節建坊銀兩疏

該臣 看得節孝有關風化表揚咸戴 皇恩伏讀 大清會典內開順治十三年題準凡旌表節孝建坊銀兩應於各該州縣學師生空缺俸廩銀兩支給永爲定例等因仰見 聖朝崇獎

節孝特給坊銀以示風勸誠盛典也是凡節婦建坊似應遵照定例支給乃近來舉報節婦俱準部咨聽本家自行建坊並未開明動給銀兩臣思節婦守志閨門幸蒙恩準建坊固已增榮閭里豈敢復希非分上瀆宸聰但查大清會典所載支給銀兩既永爲定例今若止聽自行建坊不惟與例未符且恐熒熒嫠婦多有不能勉力建坊者芳名雖錫於一時苦節難期於不朽且暮湮沒終負聖恩臣請凡題準節婦建坊銀兩仍遵大清會典定例於各府州縣學師生空缺俸廩銀兩內照例支給庶風聲旣樹奕世猶慕其流芳天地同長萬年永祝夫聖壽矣

題明四十八年大計附薦各官疏

該臣看得三年黜陟崇獎吏治典至隆也我皇上撫綏億兆

尤先澄敘官方臣一介庸材叨 恩非分惟思察吏安民以無

負 聖主委任至意是以誥誡屬員務期大法小廉共襄治理

今當課吏之期復詳加諮訪雖不乏才守兼優堪膺卓異之選

但或歷俸未滿或因公掛議臣既不敢以不合例之員遽膺

大典而使龜勉奉職者竟不獲一達 宸聰臣心竊有所不安

茲據司道府等開報請薦辰沅靖道副使孫調鼎辰州府同知

宋吉金靖州以知縣管理州事祖彰衡州府桂陽州知州伍士

琪寶慶府武岡州知州陳圖辰州府沅州以知縣管理州事馬

驂雲澈浦縣知縣譚再生郴州宜章縣知縣楊藏等前來台臣

見聞無異以上八員持已克廉遇事有爲修政事而安邊郡興

教化以淑民風刑罰既無濫加倉庫悉皆實貯洵爲屬員之盡

職者但各該員或以歷俸未深或以因公掛議皆不合卓異之

例不敢正舉然人才難得臣又不敢拘於定例而壅於上聞以蹈蔽賢之咎所當特疏附薦以昭鼓勵臣謹具題

特參學道考試冒濫以肅學政疏

欽惟我皇上崇儒敷教升俊育才於學政一差尤爲慎重併御製考試歎詩以示戒飭凡係學臣自宜矢公矢慎遴拔眞才以仰副皇上闕門造士之至意茲湖廣提學道僉事袁□上年到任臣諄諄勸勉望爲好學道上報聖主簡任之恩下開多士功名之路該道上年歲考長衡岳郴四府州生童奉法秉公頗孚輿論乃於場後補行常德歲科臣訪聞該道縱役招搖包攬而署常德府事岳州府同知吳□徇情濫送以致物議沸騰人心憤怨臣隨提訊該道夜役蕭開美卽蕭君美供稱學道卓快楊開泰夏正寅東房王舜俊包攬招搖又據生員丁用

卷之三十一

三十一

有等僉呈考試冒濫若不覆考難辨優劣隨將該道歲科兩考
取入常德府學武陵縣童生傳至臣署封門編坐出題考試首
題吾未見剛者或對曰申棖次題行天下之大道臣親加校閱
除文理平常及篇內小疵不議外如□□等十七卷文理不通
實係濫取則提學道僉事袁□考試不公署常德府事岳州府
同知吳□徇情濫送誠不能爲之寬也正在繕疏會參聞據布
政使佟國勳按察使郎廷棟詳報相同臣思學道職典衡文若
所取不堪何以表式士子學道由臣等考核若徇庇不言不幾
重負 聖明爲此會疏題參仰祈 皇上敕部將袁□吳□嚴
加議處併將□□等飭行革除以釐考弊而光 大典再違禁
冒進及書役包攬情弊俟提到楊開泰等併武童熊□陳□到
日該司審詳覆核另行具題合併陳明除將覆考原卷送部外

臣謹會題

倉穀出借生弊請發糶便民疏

該_臣看得常平倉穀原以救荒備振又慮積貯年久或致浥爛故設有出陳易新之法每年以一半存倉備振一半於青黃不接之時借給窮民令其秋收照數還倉造冊報部茲據布政司詳稱湖南積貯倉穀各府州縣遵照春借秋還之例於每年奏銷前盤查出結後卽令州縣衛遵行出借今查各州縣於秋成後有具報還倉者亦有拖欠逾年催比不完者更有屢年積欠以致官受參罰者緣法久弊滋多爲棍蠹捏名冒借侵欠不完致倉項虛懸官徒受累民不沾惠更有可疑者州縣倉穀於每年奏銷前知府盤查出結後卽令出借於民倘州縣或有虧空知府不難徇庇以盤後旋借爲辭假捏借領誑造花戶冊籍便

可掩飾及秋成無補又恐參罰復捏報收還次年盤查仍蹈舊
轍遞年遮蓋弊無底止查從前報參各官每有倉穀不清未必
不由此故是出借之法未若發糶之爲便且各省亦有存七糶
三之例請照康熙三十年前撫題請糶賣之法於每歲春初按
數減糶以平市價等因呈詳前來臣思倉穀一項將一半於春
初借給窮民秋收還倉其法未爲不善但日久弊生或棍蠹假
名冒借或州縣虧空捏造均未可定且州縣出借亦止借與有
田之戶以防拖欠而無田者原不能希冀斗升其借與有田之
家又必取保戶結狀以備查追保戶指勒索十去二三朝
廷雖有借給之名而窮民不蒙借給之惠相應據詳題請仰祈
皇上敕部嗣後將湖南各屬積貯倉穀仍照前撫臣題請糶
賣之法循各省存七糶三之例於每年春初穀貴時按二分數

減價發糶止許賣給真正窮民多不過五斗其所賣穀價不必解府致有出入留難該州縣卽眼同佐貳首領及該學教官并同城分防武職驗明收貯縣庫仍出結具報以杜侵挪俟秋成後照時價買補如有贏餘卽多買穀石存倉報明備振下年知府照買數盤查其有虧空卽以侵欺詳參如此則倉儲得以實貯貧民均蒙利益而棍蠹假冒之弊從此永杜州縣虧空之私亦難掩蓋矣

恭謝 天恩疏

康熙四十八年四月十六日據臣提塘官陳輝齋送殿試錄第一甲第一名趙熊詔 欽賜進士及第臣隨恭設香案望 闕叩頭謝 恩訖竊惟 彤墀奏對草茅端拜獻之忱 玉陛臚傳王國重賢良之選允 聖朝之鉅典尤下士之殊榮欽惟我

皇上聖聰明而作后 贊天地以育才 文教誕敷多士慶

風雲之會 天章燦著萬方仰日月之光乃平治猶厯於 睿

懷而諮詢下逮乎新進伏讀 制策首以任賢安民爲急務繼

以戒欺去僞勵官方 帝訓皇皇臣心凜凜臣男趙熊詔達

衡賤質章句庸才徒讀父書未識天人之義幸承 君命獲沾

翰墨之香十載公車敢冀昂霄登壑萬言應制無殊蠹測管窺

愧小子之何知 御筆題爲第一念書生之特達 天恩寵賚

無雙起自卑疏甯當百年之樹策非賈董豈占五色之雲臣猥

抱孤踪謬膺 異數衰年無以報 國感實切乎生成助子不

忘致 君志豈存乎溫飽惟教忠而教誠期不負科名以不負

君父願多福而多壽用克配 天地以克配 祖宗爲此具

本恭謝

特參虛兵冒餉之弊以肅軍政疏

恭惟我 皇上制治保邦安內服外文命既敷於四海武功尤震於八荒每於將帥之選既極優隆士卒之勞倍加軫恤誠爲保障地方捍衛民生慮至切而 恩至渥也 臣奉 旨前往衡永郴查看水路道過衡州府率同司道府廳縣令副將事都司田廷績齎送兵冊親詣教場校閱見其馬步守兵率多虛冒即不敢容隱爲我 皇上陳之查衡州協額設馬戰兵七十三名內存城六十七名分防外州縣六名步戰兵一百一十三名守兵四百九十七名據馬戰目兵趙之璧等回稱實在馬兵共只有四十八名其餘盡屬虛名又據護副將事都司田廷績把總張有福同該營書辦陳尙衡等回稱副將朱 親丁馬戰糧十六名步戰糧十一名守糧十八名又降調都司賀爾熾護都

司事千總潘士洪親丁馬戰糧五名步戰糧四名守糧十九名
又呈送提督馬戰糧四名楊才等步戰糧六名周用等守兵糧
二十五名龍章等俱取有親筆押單臣看得定例副將親丁三
十名都司親丁十名又準部咨內開湖廣馬兵數少官弁親丁
俱於步兵缺內頂補此定數外將家人額外爲兵或將老弱不
諳弓馬之家人充數爲兵或無家人頂食虛糧等情弊許上司
不時嚴查題參若土司將此等情弊不行查參或被傍人出首
將該督撫提鎮等嚴加議處等因在案今已參衡州協副將朱
○親丁至四十五名之多內又私食馬糧十六名降調都司賀
爾熾護都司事千總潘士洪親丁至二十八名之多內又私食
馬糧五名殊屬虛冒現任都司田廷績雖止收正月一個月糧
亦難辭咎至提督俞益謨抽取該協馬步守兵糧共三十五名

以致該協缺少馬兵四名步兵六名守兵二十五名尤屬違禁

臣思

皇上選將既極其優隆撫兵更厚爲軫恤似此虛兵冒

餉之員以有用之錢糧飽無窮之谿壑使營伍有兵之名而無兵之實何以肅軍政何以實邊防甚非所以報 皇上豢養之

恩也

臣

一介孤子謬任封疆非不知言之而適以招怨且漸必

取禍但

臣

受 恩深重不願頂踵若知此虛兵冒餉既查詢得

實而扶同隱匿畏避不言以負 皇上 臣 罪何可勝誅故甯言

之而甘受怨禍不敢不言而上欺 君父爲此據實會疏題參

請 旨敕部將朱 □ 等嚴加議處併有名營書提究追擬庶兵

有實用而餉不虛糜矣再朱 □ 已經 臣 於官支民米等事案內

糾參至此案內有提督抽取兵餉不便與提督會稿合併陳明

特參營員溺職遊擊縱兵肆橫疏

該臣奉 旨查看衡永郴水路於康熙四十八年八月二十六日抵永據零陵縣民陳生道等僉呈到臣隨批衡永郴道查訊茲據該道率同府廳縣查訊錄供前來一爲營兵夥盜偷牛私行屠宰妨農失業周振可審一爲營兵放債一年三轉取息設局囹賭陷人傾家破產唐星臺等可審一爲營兵下鄉派取稻草砍伐墳山樹木勒押鄉民挑送河邊擄船裝運陳生道等可審一守門營兵凡遇擔物進城百般抽索稍不遂意卽行打罵陳生道等可審似此營兵肆橫剝削小民皆由營弁玩法故縱所當請 旨嚴究飭革以除民害者也再永鎮中營遊擊唐之夔將餉銀交鋪換錢每封十兩定短平四五錢不等又每兩比市價必多要錢五十文鋪戶不支公派賠補被害錢鋪胡惟興向尙綸等可審又奪使河塘公田二十畝給朝陽菴僧人管業

被害陳文併僧人淨明可審又占住衛守備衙門併鎖占義學
拆毀舊守道衙門起造箭亭生員張旄等十四名併零陵縣總
甲詹聖附近居民欒君先等可審種種不法溺職已極所當一
併請 旨革職嚴提究擬以除民害者也至永州鎮總兵官李
如松統轄全鎮不能輯兵安民聽任營員恣意妄行又在永州
府永安門內開張當舖出輕入重當名存義看當人邵佳謀并
唐星臺蔣茂可審取利病民殊屬違禁但係總兵官應候 聖
裁查定例內州縣官將民之苦情已經詳報而上司不接準題
達者將上司亦行革職臣備員封疆查訊得實何敢瞻徇隱諱
匿不 上聞以辜 皇上養兵衛民之意故不避嫌怨據實會
題

衛官地方責任宜專請定考成以免違限疏

處分自必遵例拘解庶重案得以早結至於各衛盜案發覺舊例具文通報一面差役拘擒詳參疏防如限年緝賊無獲俱參衛備如衛備已經獲盜移解州縣承審遲延則參州縣此例行之已久應毋庸議再如臣及各衙門閒遇緊要詞訟必須準理者其案內人犯或係各衛屯民承審官奉文之日卽備關差役移提該衛應卽添差嚴拏如衛備不速拘犯移解或致遲延違誤卽將衛備與承審之官一併查參聽部議處庶承審文官得以依限詳結免受無辜參罰而衛備知有責成不致岐視推諉矣

微臣 負 恩實深受侮已極仰祈立 賜罷斥以全 國

體疏

竊臣 一介孤踪庸材陋質荷蒙 皇上高厚隆恩洊擢巡撫惟

思料理地方安輯兵民使沿南邊壤樂享太平稍報 君父之恩於萬一至 臣與提督俞益謨同官數載頗稱協和康熙四十二年勦撫紅苗四十五年會審土司共事或數月或數旬並無纖毫芥蒂祇緣本年八月內奉 旨前往衡永郴查看水道因在衡州府較閱兵丁見其兵馬數目不符查有副將都司虛冒併報出提督抽扣兵糧 臣從營伍起見不敢瞻徇以欺 皇上以誤地方隨具特參虛兵冒餉事據實疏 聞 臣近接邸鈔見提督俞益謨有遵 旨明白回奏一疏伏思 聖明自有洞鑒 臣何敢再行瀆奏惟是 臣心實有不白 臣身實有難安不得不就提臣所奏爲我 皇上一一陳之據提臣疏稱 臣倉猝點兵及至教場又不閱兵技藝一味動刑勒令兵房供認副將都司虛冒及提督抽取兵丁數目嚴刑之下何求不得等語查衡州

接壤長沙因其防汛不嚴屢報疎失又聞該協兵馬甚屬平常是以臣奉旨前往衡永查看水道於八月十九日到衡州卽令都司田廷績帶領各兵丁前赴教場較射而臣亦帶標下隨行之守備楊鵬等同往比箭有衡永郴道衡州府衡通判衡陽縣俱隨至教場據都司呈送點兵冊開馬兵六十名步戰兵三十一名守兵四十九名及至點名射箭時臣見步戰兵孟士傑王季文頂替馬兵射箭殊屬玩法卽行該都司革除名糧通報是該協兵餉之虛冒總由射箭兵丁名數與經制兵丁名數合算不符是以水落石出該協各書辦自行吐露開報既經開報副將都司虛冒併及提督抽扣一時官民共有見聞雖巡撫之提督軍務本是虛銜而定例頂食虛糧等弊不行查參巡撫亦在嚴加議處之內臣既身歷其地目擊其狀而扶同掩諱日後

倘有發覺百喙難辭是以不避嫌疑據實題報雖冒昧之咎固不容道而遵例查參實非得已今提臣謂臣至教場不閱兵技藝試思頂替射箭之孟士傑王季文已經革糧通報豈提督未之見耶如此而謂不閱兵技藝必如何而後可謂閱兵至謂臣動刑勒供何不指明所動何刑是副將都司以此欺提督而提督卽以此欺皇上也又謂其事七載被參七次臣更不勝駭異查臣與提督衙門並無關涉有何參劾惟康熙四十七年軍政提督俞益謨疏稱偏沅巡撫趙申喬等各揭報臣以巡撫衙門從無揭報提督之例是以疏請查明續準部議據提督呈稱因書識繕正之人竟將咨移二字遺漏將遺漏之人痛加責懲應毋庸議等因具題奉旨依議欽此欽遵在案是臣所遵者朝廷之體統非爲一已而較量此外並未敢得罪提督而提

臣謂被參七次不知其六次是何案件是何緣由提督卽欲參
臣陷臣而不應以此欺皇上也至提臣謂臣實無善政此不
待提督言之臣亦自知之臣無才無力有何善政不過祇遵
聖訓盡革私徵力減加耗而衰年竊祿深愧素餐提臣所言極
爲切當此臣之所爲亟請皇上立賜罷斥以勵臣職者也至
臣備員巡撫極知愆尤叢積但臣奉職無狀皇上自誅之殛
之提臣安得而侮之辱之臣雖不肖未膏皇上之斧鉞則猶
一無臣也何至以皇上未加誅殛之撫臣而提督輒指之爲
如鬼蜮且臣奉旨往衡永查看水道非鬼蜮之奉差也臣
在衡州教場非鬼蜮之潛行也臣無一毫之贓私豈有贓私者
非鬼蜮而無贓私者反爲鬼蜮臣無一字之欺罔豈有欺罔者
非鬼蜮而無欺罔者反爲鬼蜮提督卽欲參臣陷臣而不應侮

臣辱臣 詆毀至於此極 臣不足惜如 國體何 皇上卽不斥
臣提督必將殺 臣卽提督不能殺 臣而 臣亦何顏立於官民之
上與之比肩事 主此 臣之所爲亟請 皇上立賜罷斥以全
國體者也總之 臣賦性愚昧暗於事勢惟知畏 皇上不知
畏提督其招怨取禍 臣原疏已痛切言之今觸提督之鋒而侮
辱一至於此仰祈 皇上鑒 臣憐 臣卽賜罷斥則感激 高厚
永矢於生生世世矣

題明接緝命犯處分之例以廣 皇仁疏

該 臣 看得叛盜重案承緝接緝各官定例處分甚明惟命案兇
犯在逃限緝處分例不盡一茲據按察使郎廷棟詳稱湖廣人
命案件凡兇犯脫逃未獲初照定例六個月限滿先以承緝職
名查參部覆勒限嚴緝至一年限滿無獲卽照年限請參第勒

限緝兇之員內有承緝接緝不同在承緝之官初限再限一參覆參猶屬任內所出之事若接緝之員既非任內所出併令一眼再限一參再參兇犯遠颺無獲接緝疊受處分永難陞轉殊爲可憫詳請題明更定永爲遵守等因前來臣查情罪重大莫如叛盜二案承緝接緝叛犯定例以三年爲限限內處分之後準其照案緝拏又承緝盜犯定例一年無獲再限一年通計二年依限參處亦準照案緝拏其協緝接緝之員非伊任內所出之事則免參處惟兇犯在逃命案處分承緝接緝獨無定限今湖南定案若兇犯無獲無論接緝與續接緝之員一遇限滿查參議處仍令勒緝如不獲仍令限年參處似此接踵報參終無底止且兇犯脫逃勢必遠颺年久月深焉能保其常存臣請嗣後凡人命兇犯脫逃應否照依直隸撫臣條奏以緝獲兇犯之

日扣限審結抑或仍以報官之日照命案限期將承緝遲延職名查參俟部覆至日定限一年緝拏如限滿不獲一次參處之後卽準照案通緝免其再限覆參其接緝之員止令嚴緝寬其限年參處至於殺人兇犯如果藏匿本境該管官員知而容隱不行拏究別經發覺將容隱之官參處如該管各員委不知情係地方棍徒容隱者止將容隱之人治罪如先雖容隱後仍自行出首亦準免罪庶殺人兇犯不致疎縱漏網而承緝接緝之官亦免受無辜之參罰率土臣工永戴皇恩於億萬年矣

漢土田畝侵隱不清疏

該臣看得容美土司買墾石門縣老荒田地按則陞科一案經臣咨準部覆檄行布政司查明定議詳報去後茲據布政使佟國勳查議前來臣查漢土田地各有疆界若漢民之田賣與土

司不持有侵佔之弊且恐開爭擾之端嗣後若將田地賣與土
司比照民苗結親例各杖一百土司準其折贖田價入官田畝
變價充餉說合之人減一等杖九十在地保甲知情不報亦杖
九十該管官失察降一級調用該管道府罰俸一年再從前已
賣田地嚴責地方官確查如有賣與土司者諭令備價取贖倘
土司刁措不容取贖許業主控告查係情真竟將田價入官田
還原主仍將土司照例治罪如有地棍捏控取贖照例究治田
畝仍令變價銀兩給還土司通限六個月限滿該地方官出具
印結彙造贖回田畝細冊并取各業主甘結詳請咨部銷案并
於年終時飭令該州縣出具並無漢土買賣田地印結通報備
案如有失察照例參處既據該司詳議臣等覆查無異理合題
請仰祈 敕部定議遵行庶漢土各有攸分而地方亦無侵擾

之患矣

復業苗民定管轄專撫綏以弘德化疏

該臣看得鎮筮有鎮苗筮苗之分鎮苗向係鎮谿所管撫筮苗卽紅苗向係筮子坪長官司撫管前明以鎮苗令永順司擔承筮苗令保靖司擔承苗仍叛服無常二土司徒有擔承之名毫無實濟後鎮谿上六里之苗因與保靖司相近遂歸該土司管轄會於康熙二十三年內苗赴鎮谿投見願歸版籍經辰州府查議六里若歸鎮谿則必題請設官似應仍歸保靖管轄又於二十七年因永保二司互爭經辰岳兩道會查以六里地方附近保靖詳允仍歸保靖撫管又於三十二年內苗民以棄暴歸仁事奔訴永順司轉詳經布政司辰沅道查明苗民今若歸漢必須題設流官坐鎮莫若仍歸老土官管理詳經前督撫臣批

介因未便請設專官故暫令該土司約束今紅苗自四十二年撫攝之後率皆輸誠納糧又題明請設寨長土百戶催徵巡緝移設道員同知通判兼轄并添撥弁兵鎮防莫不傾心歸化安耕樂業是以六里苗民龍德思等有捨死投光之控不願仍歸土司所管情願改土歸漢嗣濂司道府查議六里苗人龍德思等情願復歸版圖納糧請令土弁宋純漢約束前來臣查鎮谿所六里苗民從前雖聽保靖司管撫今龍德思願爲聖朝編戶歸漢納糧似難阻其歸誠相應準令復業但宋純漢土弁微員鎮谿既設流官應將六里苗民責令土弁專司約束乾州同知管轄辰沅靖道統轄則撫馭得人而苗民永沾聖化矣

趙恭毅公贍藁卷第二

趙恭毅公贍藁卷第三

孫男侗敦謹編

奏疏

恭謝

天恩疏

以下偏撫任

竊臣一介微蹤叨荷聖恩破格超擢轉補偏沅巡撫受恩既深圖報彌切惟以君父爲心地方爲務如有目擊之重事敢不據實以上聞然而才識未優愆尤日積若非聖明之曲宥安能保全以至今臣每一念及宵旦悚惶不知何以無負生成稍安夢寐茲欽差吏部尚書蕭永藻等奉旨察審提督俞益謨抽取兵餉總兵官李如松開張典當各緣由部議應如尙書蕭永藻等所議將臣革職誠爲允當乃蒙皇上恩同覆載明並矧臨曲賜寬容不卽罷斥俾臣革職仍留原任聞命之日感激涕零隨恭設香案望闕叩謝并祇遵任事外

Page not available.

Please help scan and add.

页面不可用。

请协助扫描添加。

一康熙四十二年諭總督奉 旨勦撫紅苗巡撫不過往彼料理糧餉諭總督先到荊州迎接 欽差預支荊庫銀一千兩製備鑼鍋帳房分送大人不是巡撫做的亦不是巡撫送的事完之後諭總督開單取藩庫銀一千兩補還荊庫此項已經藩司造冊詳齋郭總督核明題達在案今俞提督參 職 希圖冒銷但當日 欽差部堂副都統帶先鋒擺牙喇跋涉數千里勦撫紅苗難道帶了鑼鍋帳房來的若有冒銷亦應問諭總督清算與巡撫何干統聽剖裁立昭陷害

一康熙四十四年因修造橋梁備辦船隻借動庫銀又將四十五年俸工捐補此項已於遵 旨明白回奏等事題明在案今俞提督參 職 所修是何橋梁是何地方備辦船隻作何用處現在灣泊何處查湘陰澧州俱有浮橋益陽湘潭武陵岳州澧州

Page not available.

Please help scan and add.

页面不可用。

请协助扫描添加。

工並未扣捐有布政司可詢其四十七年因修天然壩題捐在案至四十八年俸工並未扣捐有布政司可詢今俞提督參職每年扣取俸工銀自四十二年起至四十八年止扣取俸工銀七萬一千六百四十兩零懇問布政司四十六八兩年曾否扣取俸工歷年有無餘賸現存便見明白至四十三年捐耗因四十二年冬勦撫紅苗大師雲集一應諸費皆借帑應用四十三四兩年俸工已捐修嶽廟其庫項不可虛懸署布政司張仕可詳稱各州縣願將加一火耗之內扣捐五分清補軍需用項通詳兩院批准已於遵旨明白回奏等事題明又經藩司造冊詳齎郭總督核明題達在案今俞提督參職每年抽火耗八千零八十兩自四十二年起到四十八年止共抽銀五萬六千五百六十兩但職奉 上諭力減加耗自四十二年到任痛加禁

革若有重耗卽據揭糾參如瀏陽武陵零陵三縣咨以重耗併參扶同不揭之布政使董昭祚如巡撫旣抽火耗又參重耗則被參之董昭祚豈肯不供扳巡撫抽耗尙待俞提督今日誣參懇問四十八年佟布政使四十二三兩年陞任施布政使四十四五六年革職董布政使四十七年署司郎按察使若巡撫趙申喬曾得他分毫火耗情愿碎屍萬段以謝湖南各州縣至四十八年二月所行飭行扣捐一票因地方公事如黃蠟腳價硃砂折價不敷銅價及豫塘工食地方官原有幫捐銀兩職恐州縣不肯捐資或借端派擾所以行府轉飭各州縣於工食內抽捐充用仍將各扣捐數目據實詳明以憑查核併知炤布政司在案若係私用何須更要開明數目詳核且已行知布政司何嘗不使司道與聞俞提督借此併參其陷害之心何所不至可

知統候裁剖立雪冤誣

一康熙四十二年職由武昌到任舟泊鐵牛廠有漢口鹽商來

見諭以湖南百姓苦於鹽貴竟多淡食皆由衙門陋弊未除以

至苦累百姓巡撫如得你們分毫陋規日後不能由此水路還

鄉所以到任以後將衙門鹽商陋規盡行革除不下數千兩無

非仰體 皇上愛民恤商之意今俞提督參職自四十二年

至四十六年止每年得受衙承寶三府鹽商銀三千兩共銀一

萬五千兩其四十六年銀三千兩係伊迎 駕商人俞子易在

揚州於伊舟中親手交受但俞子易乃山東異棍在江南行鹽

俞提督在江南做大廳卽與聯宗人所共知職與俞子易不但

從未往來且並未識面職若要取鹽商陋規難道只收衙承寶

三府的就收四府的四十六年既是俞子易交受其四十二

年四十三四五年係何人交受俞提督何不逐年指出其人作證而偏借聯宗光棍已問死罪之俞子易捨通誣陷天日爲昏況俞子易在揚州俞提督在常德旣未目擊從何知道旣是四十六年之事俞提督眞知確見何不於回奏本內卽行參出直待至數月之內設計陷害難逃洞鑿懇提俞子易質審併先提歷年商人汪興益到案嚴究每年銀三千兩作何交受統候鑒察立昭誣害

一康熙四十二年職在江南接駕奉有力減加耗盡革私微之諭旨是以到任以後實力奉行尤先禁絕餽送以杜私派從未妄取一分一文甘爲狼籍無恥以預君父之恩若巡撫果要貪贓何須借罰銀名色爲入己之地惟是或有過失尙小參處則恐其太重不究則恐致效尤故量追銀兩以充地方公

用以示懲儆如武岡州劉之琨里役王天佑等被控追銀七百七十六兩零藩司收補軍供銀四百七十六兩零又收補喻總督借庫買馬賞兵銀三百兩衡陽縣張廷相里役許良瓊等被控追銀九百五十兩藩司收補喻總督借庫銀買馬賞兵之項湘潭縣修朝彬爲審擬馮永詳命案責令出銀三百兩於報明夏受水災案內發華容安鄉二縣各一百五十兩作運穀水腳賑濟饑民益陽縣捐貢徐日炯因與蕭修純賭博一案責令出銀二百兩齎交臨湘縣分給災民驛糧道光報完舛錯卽將原銀五百九十一兩六錢八分零捐助修城至張臣德係現任攸縣知縣並無罰銀之案止有已故攸縣知縣張綸因碾米所餘穀價二百兩追發長沙善化二縣修建上諭碑亭至衡州府知府江國楨於康熙四十二年丁憂卽於本年冬領咨回旗

何有四十二年措留納銀方容起身之事但職於四十二年到任訪聞江國楨於四十一年有衡陽衡山耒陽安仁四縣運米水腳銀共九百二十二兩未發卽行布政司糧道飭將原銀六百十八兩發衡陽縣二百三十六兩發衡山縣四十四兩發耒陽縣二十四兩發安仁縣卽爲四十二年運腳之用取有四該縣收管在案並無措留納銀以上各項職如有分文入己便是眞正狼籍無恥願甘萬死至益陽縣李光白罰銀一百兩職任內並無此案止於康熙四十四年二月內有益陽縣民隆席儒等以貢生夏光白因僕夏正等逃走將伊等嚇鎖具詞控告隨批按察司查報緣夏光白患病未經解訊旋據按察司以夏光白病故時值農忙詳請從寬結案以免拖累隨批夏光白旣故如詳結案以免拖累並無罰銀一百兩之事其沅州知州馬騰

雲原任湘鄉縣並無罰銀六百兩免參私派之事邵陽縣知縣李架並無重耗罰銀二百七十兩之事若有卷案署院豈不查出不知俞提督何憑捏造卽張臣德現任職官俞提督尙稱爲已故明係聽人指授統候鑒察立昭陷害

一康熙四十八年八月內職奉旨查看衡永水路先到衡州

府令衡協帶兵丁赴教場射箭因營書不知兵馬數目故行拏問並未用刑而俞提督乃稱刑挾營書不知所用何刑又到永州府有永州鎮差人持帖來迎職以船小不便相會隨差人齎帖回覆俟到府奉拜及到永州親拜李總鎮敘談甚久至次日開船總鎮亦差人持帖相送職亦以船小難於相會隨差人齎帖叩謝此眾人所共見俞提督乃稱竟不接禮反叱使擲帖世無此事且俞提督不會到彼何以知之又稱授意士民控其縱

衡州府志卷之六十一

兵虐民

職

與李總鎮素無嫌怨因何授意士民具控卽士民公

呈亦止告遊擊唐之夔並不會告李總兵

職

疏內亦止說李總

兵不能輯

兵安民聽任唐之夔亦不會參他縱兵虐民俞提督

既稱授意士民則何人授意併授意於何人懇乞究明

一巡撫有察吏安民之責屬官貪婪酷虐者不得不遵 功令

糾參以懲一儆百如康熙四十七年參瀏陽縣申可貞重耗

職

併以不能覺察自劾部議罰俸一年是參官原非得已有何賣

弄威權至錢糧命案盜案自有處分定例尤難曲徇據俞提督

稱屬官稍存公正不肯迎合意旨者惟恐去之不速其公正者

何人所去者何人俞提督何不直指姓名揣其意不過借現任

官以起下文之去任官耳其歷歷參官姓名數目併所屬府州

縣至今一處更歷幾官若行布政司查明虛實立見

一康熙四十七年四月布政使董昭祚丁憂職以會審黃萬年

一案尙在鎮算乃董昭祚丁憂之文未報而長沙府知府崔岱

齊據士民潘世德等保留之詳先到職隨批云董藩司既經丁

憂何以至今未據文報該府所詳殊屬虛誕及回長沙據該府

稱遞呈保留不過三四人隨訊據潘世德吳沔等供出賄買情

形職以孝道有虧是以據實題參至於武陵零陵瀏陽等縣恣

意加耗皆由董昭祚在任時縱庇貪員所致是以照例併參且

於參瀏陽縣申可貞疏內敘明緣由據俞提督謂職不應不參

於在任之前而參於丁憂之後則內部何以有革職提問之議

皇上何以有依議之旨且今別省現有參知府通判而併

參前任兩司者豈得以去任而不遵定例俞提督總欲借此以

參巡撫併借此以報董昭祚其徇私挾仇顯然可見

一康熙四十二年四月職到任之初每遇升堂卽見中軍遊擊站班詢之據稱向來舊例職以旣是舊例若不令站班反近於私故仍照例行至於朝服不許輕用職遵部議卽屬員新任初見亦止令穿補褂而俞提督以爲朝服站班不知是何人看見現有中軍官可問其遊擊胡璉泄瀉遺矢之說實未聽聞宋旭擅取官物役使兵丁若不應題參則內部何以議革職併奉有依議之旨朱袞欠銀五百兩不知誰爲援職赦朱士芝如果在職恩赦之內則督審自爲援職赦若以不應赦之案而妄稱應赦尙可謂知有職功令乎

一康熙四十六年職署理學院印務因楚省生員向來鬼接頭飛過海及附案諸名目雖經前任郭總督參革而濛朧隱伏者尙多適長沙府有陳士壘頂向廷高改名入學被許詳請題參

部議行查失察上司是以檄行各學通查及新學道既到亦未詳結何有捲堂之事至於丁用有控告道役蕭君美招搖隨行袁學道及靖州查拿據袁學道以蕭君美卽蕭開美遂將蕭開美交靖州詳審據蕭開美供出作弊之東房王舜俊卓快楊開泰夏正寅故據實題參以肅學政今此案總督正在查審尙未題覆俞提督乃稱總督審得四人冤抑實是無辜而題覆疏內只得稱係招搖並未受賄不知俞提督何時見此覆疏若以未經題覆之案混稱題覆此可捏造則何不可捏造

一康熙四十二年

職

到任之後見湖南民俗健訟諄諄誠飭尤

嚴拏訟師以杜訟源每遇告期百紙之內所准不過數張批發所屬衙門必催速審審出誣告必反坐嚴懲期於息訟安民共享太平而俞提督謂貧與富爭必袒貧而富者之身家立破民

與兵訟必袒民而兵丁之性命必危俞提督統轄兵丁知之既悉其六七年來兵丁之危性命者幾人何不指出姓名以實巡撫之罪至何小楊何智亢係有名積棍受賄詭呈已發驛糧道審出賄買真情姑從寬發落而俞提督反據爲口實庇惡長刁莫甚於此

一康熙四十六年六月內寧鄉縣民後舜臣家被盜劫殺該縣獲盜劉邦興向心拔何子安劉騰輝四犯該司審據陳氏供當夜盜進房來聽得丈夫口說認係劉回之語而陳氏亦以劉回認識呼喚火光之下並未真知確見遂疑劉回之爲劉邦興報縣嚴訊劉邦興遂誣扳舜臣之舅向心拔而心拔又扳出邦興之舅何子安父劉騰輝展轉誣扳幾成冤獄及訊邦興供後家失盜同眾往救而甲長鄰佑俱指同爲救護且邦興爲後姓近

鄰何以不塗面改形而向心拔爲舜臣母舅豈忍心至此況賊械俱無讞鞫旣明白難以被誣之四犯而輕議駢斬盜固不可縱良亦未可誣據俞提督參職縱盜殃民推其心必誣良爲盜殺戮無辜而後快亦不體 聖朝泣罪解網之心矣

一職

自蒙 皇上拔擢以來惟以 聖旨寬大之心爲心從不

忍苛求小過從不敢偏執己見其屬員中或私派或重耗或倉庫虧空或承審出入例不得不據實糾參然內有部院之核議外有督審之精詳又皆決自 宸衷遵奉施行而俞提督參職

大奸隱惡刻意害人一應參疏並不臚列多款實情但曰某官重耗某官虧空豈以不重耗而可參其重耗不虧空而可參其虧空乎抑以重耗爲不必參虧空爲不必參乎又謂職七年之中參官三百餘員夫俞提督旣查明員數則何不指其姓名以

見職之濫參濫劾而第約略其詞以陷人於罪則誰爲大奸誰爲隱惡又有不俟職言者矣以上諸條俞提督於巡撫衙門疏章牌票錢糧刑名學政鹽規詞訟盜賊與夫標員之衣襪瀉便無不留心察訪搜羅殆盡而獨以該管之兵馬置之膜外豈真明於巡撫之事而暗於提督之職其聽人提掇挾仇砌陷已於十四條中和盤託出矣統祈電雪

憑情籲休疏

竊臣一介庸材謏劣無似由刑部員外郎告假在籍蒙恩召見特授浙江布政使隨陞本省巡撫又調用今職偏沅巡撫此從來未有之遭逢臣自顧何人膺茲異數雖竭盡駑駘猶未足報稱萬一而臣賦質愚闇秉性拘迂九載以來罪愆實多若非聖主之寬恩安能苟延於今日此臣所宵旦瞻天感

Page not available.

Please help scan and add.

页面不可用。

请协助扫描添加。

恩於罔極矣

請定接審命盜處分以昭畫一疏

該臣看得處分定例承審人命盜案初次遲延者照例議處覆參遲延者將承審各官革職但在現任遲延者初參覆參自難辭咎若接任之員屆滿覆參照例參處則從前之承審遲延者限滿雖參不過罰俸而接任之員接審未久覆參即罹革職殊爲可憫嗣後人命盜案除現任承審遲延者一參再參仍應照舊處分外如參後遇事離任其接任之員接審未久請照承審虧空之例俱以本官到任日期扣限止照初參例處分則接審官員得以盡心讞鞠而無重譴之虞矣又凡因公註誤緣事解任等官有應追銀兩已經回籍回旗查追必俟此項拖欠銀兩催完始將原參承追督催之員各案查銷但回旗回籍之員既

有本旗本籍承追不力之處分又將原參承追督催各官不准開復註銷似屬過抑嗣後如遇因公註誤緣事解任等官有應追銀兩在任所承追督催未完者照舊參處外如有力不能完已經回籍回旗官員該督撫將未完銀兩細數造冊送部轉交該籍督撫該旗都統查變家產追補若屆限無完卽照例將該籍該旗承追督催各官查參其原參承追督催各官既無追催之責應於咨部轉交該籍該旗變產追補之日卽行詳請開復註銷則原參各官不致坐受參罰而有奮勉之思矣凡此定例雖遵行已久而一爲變通則接審與承審不同原參與承追亦異有應得之處分固所以專責成而酌可寬之條例亦所以惜人才茲據該司呈詳臣覆加酌議相應題請仰祈 皇上睿鑒敕部議覆以便遵行

特參縣令違禁私派疏

該臣看得湖南地方向苦私派累民臣仰遵盡革私徵之諭旨嚴行飭禁務期陋弊悉除與民休息以無負聖主愛養黎元至意乃有岳州府華容縣知縣詹□者輒敢悖逆功令恣意私徵聽信蠹書陳羽仲等指稱田畝科則名目攤派通縣每糧一石銀六分共計派銀六百餘兩蠹差藍相一等可證臣訪聞既確正在繕疏間據司道府各揭報前來似此私派病民大千法紀誠難一日姑容致貽民害所當特疏糾參請旨革職併有名蠹役一併嚴提究擬以懲貪劣而肅官箴者也

法司實關重任據實陳請疏

欽惟我皇上覆育羣生恩覃溥海本一體如傷之懷廣泣罪解網之德每當讞牘上陳雖一日萬幾必詳加察核務期情罪

允協不忍一命或冤數十年來其生全於 聖明矜恤之中者
固已慶再造而祝萬年矣 臣思刑獄之所係甚大則法司之所
任非輕况楚民刁健每架虛詞以快私忿若非折獄明允則刑
不能無濫施而罰不定加於有罪今 臣屬按察使郎廷棟病故
員缺部臣循次開列自應祗候 睿裁簡用 臣何敢冒昧以瀆
聖聰但 臣竊見 皇上圖治之心甚懇需才之念甚切若有
所知而不舉以入告恐非以人事 君之義查 臣屬分守衡永
郴道僉事王朝恩愛惜名節服官廉謹今委署按察司事將及
一月存心平恕持議周詳屏絕苞苴聽斷明敏似可膺法司之
任倘蒙 皇上特恩破格卽以陞補臬司員缺則奉法不致枉
民命而明刑可以佐好生 臣非不知僉事難以越陞坐名尤爲
干禁但 臣受 恩深重固不敢徇情以欺 主亦何敢隱默以

Page not available.

Please help scan and add.

页面不可用。

请协助扫描添加。

Page not available.

Please help scan and add.

页面不可用。

请协助扫描添加。

敢擅便也再照此係臣據見聞入告是以不敢會同督臣列銜
合併陳明

請將南秋支剩米石定價折徵疏

臣查湖南支贖南秋米石先經原任撫臣興永朝以湖南產米
之鄉民間平價大率五錢若以七錢定折尚覺過多議以每石
折銀六錢民自樂輸等因具題奉 旨依議通飭欽照在案自
康熙二十八年折徵起頻年以來小民輸將無不稱便迨四十
四年分報存米折銀兩部議照折給官俸役食之例每石作七
錢折徵而四十六年亦照此例折解是六錢之外又已加徵一
錢至四十七年支贖米折已照每石七錢折解部覆又令照時
價折銀至今尚未定局其各屬四十八年支剩及續完解部米
折并湘鄉縣續完貯庫米折原照題定價值六錢徵解而部覆

俱令照時價折銀但南秋二米定例俱於七月初一開徵每年除撥支兵糧外約存贖米五萬餘石應折徵解部此項米石該道原無貯米之倉並無徵收本色易銀起解總於兵糧外開徵時卽令民間照定價納銀解部充餉價有一定故愚民莫不通曉而胥吏不能爲奸今若照時價折徵如應徵南秋米石係長衡岳寶靖五府州屬合計二十七州縣其地方之遠近水陸之通阻不同而田地之肥磽雨澤之多寡亦不一則彼此米價自有低昂且民間完納自本年七月至下年五月奏銷先後旣各殊時價值自無一定若前項支贖米石必令各照時價折徵竊恐經徵不肖官役任意增減而旣徵之後又復補徵完納苦於零星徵收無不擾累臣思徵輸錢糧均有定額獨此米折一項雖經題定六錢折價屢年駁增究無一定之規相應題請仰祈

敕部准將湖南四十七八九年分已未起解并報收續完及未完米石仍照四十四六七年之例每石補徵銀一錢其五十年以後支贍米石應否仍照題定每石六錢徵解卽以近來米價稍貴亦照七錢定價折徵俾章程永定庶官常有遵民易輸將頂祝 聖壽於億萬年矣

恭謝 天恩疏

竊臣荷蒙 聖恩起擢巡撫而才疎識闇愆咎實多乃我 皇上量同天地德普生成臣罪應褫革而 皇上仍不忍棄捐臣年已衰老而 皇上仍不加擯廢屢邀 浩蕩之洪慈並無涓埃之報効撫衷慙疚啟處不遑復荷 恩綸謬叨 異數還臣原職授臣都察院左都御史聞 命感激繼以涕零惟是臣以臣爲劣之才膺茲風紀之任何以不負 朝廷何以不辜職守雖

殫心竭力砥節奉公恐不足以報 高厚於萬一耳

躬逢 萬壽昌期謹推三年蠲免錢糧之例請免本年民

房地租以廣 皇仁以祝萬年疏 以下總憲任

竊惟 皇上撫育羣生五十餘年德洋恩溥淪肌浹髓猶且軫如傷之念頒格外之恩將天下地丁錢糧自五十年爲始三年之內全免一周總計免過新徵舊欠共銀三千二百六萬四千六百九十七兩有奇誠千古未有之殊澤斯民幸覩之隆施也一時耕田鑿井之眾莫不嬉遊化日歌詠堯天矣惟住居官地之民其房雖民自造而地原屬於官每年地租亦分所應納但此等租銀大戶百無一二多係貧乏小民或開店營生或挑擔餬口一日所得不足養贍妻孥且租有昔輕而今重者人有屢易而已非者所以輸納不前拖欠累積有司之催徵徒施敲撲

冊上之銀數僅爾虛懸夫耕 朝廷之土者已獲蠲新舊之賦
棲 朝廷之地者亦冀免新舊之租幸遇 六旬大慶之期正
四民望 恩之會伏乞 敕部將康熙五十二年地租并舊欠
實數查明開奏應否照蠲免天下地丁錢糧新徵舊欠之例出
自 天恩則九野咸歌樂郊而萬年永登 壽域矣 臣謹體
皇上愛民如子恐一夫不獲之心籲陳萬姓望 君如歲有不
容膜置之隱冒瀆 宸嚴仰祈 慈宥

恭逢 萬壽昌期請定萬年國本摺

欽惟我 皇上繼 天立極統御寰區削平宇內 躬致乂安
宵旰勤勞政事修舉尤念 太祖 太宗 世祖付託之重百
官萬民係望之殷思深慮遠慎於儲位不以恩掩義不以情廢
法固 祖宗在天之所式憑而天下臣民之所共仰者也然青